

南洲吟草

岑君任

先生鄉籍待考、精於岐黃、早年移醫席於馬來西亞雪蘭莪州、活人無數。能詩惟不常作、嘗曰人以性命託我、須竭智盡能以赴之、豈敢輕易分其心力、以謀一字一句之安乎。但其偶然遣興、輒一揮而就、便天然流暢。事略與詩章、見順德聯誼總會鳳嶺僑聲第廿一期、及一九五五年南海李景康等倡印之現代詩鈔卷二。

丁亥重陽和陳伯華酬招觀海博士韻公元一九四七年

欲歸無計且淹留、手把茱萸爲賦秋。鬢髮浩然衝雪鶴、才華爭似上灘舟。一尊濁酒聊滄海、二老文章入選樓。佳節每逢增感喟、漫天風雨寫羈愁。

雪峰翁出示和蘭生翁談苑即事步原玉奉和

縱未相呼也暫留、愛聽諸老說瀛洲。品量人物嫌多事、豁達襟懷不賦秋。詩興乍添醅蟻泛、詞源助湧茗香流。禮儀脫略饒天趣、休就莊諧判孰優。

夜雨

夜雨疏遠密、山風吹木號。天空乍明滅、砌下旻波濤。眼倦燈生暈、酒醒情更豪。惟思續餘醉、詩債夢中逃。

郊行

一路經行處、朝花帶露妍。斷雲閒戀岫、遠樹欲齊天。地僻人蹤少、境幽塵慮蠲。鐘鳴梵宇近、覺岸正當前。

書懷

卅載饑驅白髮侵、前塵若夢懶追尋。胸無奇氣徒澆酒、詩不求工少費心。世事微茫難逆料、天涯寥落自沉吟。遙憐翠竹山前路、半是頽垣半蔗林。

夢蝶詩存

伍憲子

先生諱莊、號憲齋。別署夢蝶。生於公元一八八一年、卒於公元一九五九年、鄉籍古朗。少從讀書草堂簡岸先生游、潛心經史詞章之學、立修齊治平之志、乃曾一度從康梁維新主張、及與梁蔡密謀倒袁之策、浮沈政海多年、亦於海內外從事報業爲時甚久、歷任廣州國事日報、北京國民公報、香港商報、美國三藩市世界日報及紐約公報主筆、以鼓吹民主、促進大同之治。寓港期間、力力宣揚孔學、協助孔聖會成立、主講學海書樓及各大學術機構、閒與同邑黃偉伯、馮漸遠、番禺謝焜彝開碩果詩社、作嚶鳴之求友、至終年於香港。遺著有經學通論、論語讀法、國學概論、尚書源流考等。事略見旅美三邑總會館簡史、簡岸先生讀書堂再傳弟子輯刊之松桂堂集、詩章見碩果社歷期詩集及三藩市世界日報。

自序

有詩家之詩、有學人之詩、有英雄豪傑之詩、有里巷勞人思婦農夫擊壤之詩。講格律、講聲調、摹倣漢魏唐宋諸家法、閉門苦思、孳孳然爲傳名傳世而始下筆、此詩家之詩也。樸實說理、變散文之法以爲詩、有時擺脫法律、仰天高歌、發詩工詩衰之音、遠牢騷抑鬱之氣、此學人之詩也。橫槊大江、飲馬長城、風吹草低見牛羊、醉倚東門以長嘯、不規規於所謂李杜韓蘇、更不識有所謂陸尤楊范、此英雄豪傑之詩也。領略大自然之真趣、而發舒其性情、受環境之刺激、而感動其胸臆、無所顧忌、率爾爲之、不事修飾、盎然出之、此里巷勞人思婦農夫擊壤之詩也。是四者、各有取焉。吾於詩、未嘗下苦功、從來亦無占詩家一席之想、既不好名、復無懼慮、則上下天地、獨往獨來、窮宇宙之奧奇、探人生之蘊秘、性靈不屈、曲折奔馳、情素能通、纏綿悱惻、亦何所思而不達哉。萬法盡歸眼底、河嶽星辰、百年收入夢中、歡哀悲泣、吾果何愛也、吾亦果何憎也、誦吾詩者、無以跡象求之、澄澈天空、聲籟俱

寂、如是焉矣耳。

留別金門諸友兩首

錄自三藩市旅美三邑總會館百二十五年簡史內載先生主筆世界日報刊於一九三三年者句內有無冠二字即先生自嘲無冕皇帝也

七年避亂看迷國、寂寂金門博浪樓。縱使文章驚美陸、空拋心力贖人頭。家原有母當歸養、帝實無冠免乞休。別後良朋如問訊、是真面目可長留。

其二

恥作奴才懶作官、七年於外負忠肝。傷心國土驚將盡、帶血文章嘔未乾。豈謂陶潛憎斗米、祇因屈子護香蘭。金門尚有重來日、不老廉頗更據鞍。

論詩以下錄自碩果詩社歷期詩集

詩以道性情、溫柔顯敦厚、溯源三百篇、此義誰能否。

前題之二

有時逾正軌、嫉惡例當嚴、取彼投豺虎、鋒芒透筆尖。

前題之三

魏晉至南朝、肉厚嫌無骨、我獨取阮陶、摸得言中物。

前題之四

李杜大如海、誰能蹊徑尋、可憐門外漢、偏學盛唐音。

前題之五

近體玉溪生、古體臨川集、少時最服膺、到老勤溫習。

題東坡笠屐圖

亂離方憶太平人、貶謫猶存自在身。莫怪南方多瘴霧、翻從笠屐見丰神。朝雲夢可時忘寂、靖節詩能與日親。渡水穿林黎俗慣、接羅無用再因陳。

聽曲

劉娘已嫁靈芝老、寂寞雲紅已歇歌。自別京華遯南島、幾經滄海藐江沱。慰情蘇李成陳事、爭道梅程各異科。豈謂天涯行倦後、忽開深霧見姮娥。

又

天真爛漫非奇異、難得風塵有性情。我是傷心愛悲劇、汝能伏地作哀聲。現身說法皆中道、選色徵歌入上乘。勿笑孤山林處士、杜陵兄妹足相稱。

歸途遇雨

又遇飄風急雨來、行人凌亂有顛顛。明知平野歸途遠、正好安心緩步回。澤國已成占木滅、晴天將待撥雲開。淋漓休怵禪家喻、自是雍容變理才。

聞道和平

收薊傳聞足放歌、況生今日喜如何。修羅擲彈天空遁、餓鬼爭糧地獄過。念佛與誰尋淨土、登仙無處望銀河。正逢絕路難爲計、報道休兵已議和。

戰後香江重見杜鵑

不分獅山變鶴林、曾經兵燹復來尋。殷紅嫩綠遺枝在、玉女花神隔院深。設想津橋啼血淚、寄身閒苑望春陰。煖風十里隨流澗、躑躅忘歸日已沈。

戊子九日二首

雙十狂歡已過時、繼逢陽九動憂思。龍山落帽風吹鬢、泰嶽登峰火及眉。射雁關弓忘舊箭、題糕沒字鬥新詩。應知他日誰稱健、且看黃花莫傍籬。

無地登高可避災、長房今在費心裁。乾沙槁草行千里、白骨青燐遍九垓。未許囊萸攜酒去、難容把菊望人來。講經射馬昇平事、靜待春回掃劫灰。

過抗風軒遺址

去鄉三十年、亂後歸佗市。夜飲南園中、憶前五世紀。詩社風初開、嶺才氣雄峙。孫黃

負節概、雪逢黃哲賢邑宰。長史李德文教興、臨清趙介辟不起。彥舉王佐堅乞歸、詩人風格

美。留得抗風軒、名齊前五子。不讓吳與閩、傑出跨嶺海。明初楊孟載等稱吳中四傑林子羽

自從永樂後、詩衰臺閣體。中興賴茶陵、李東陽並起尊何李。何景明李夢陽七子貫前後、前

七子李夢陽何景明徐禎卿邊貢康海王九思王廷相嶺嶠氣無餒。矯矯梁蘭汀、力足四溟比。

繼軌開南園、恥食嚴嵩米。歐黎及李吳、歐大任梁有譽黎文表吳旦後五名同偉。有明一代詩

、疊變逞奇詭。元習未能除、初變晚唐止。變宋復變唐、盛初中分軌。極變至公安、袁宏道

糅雜趨鄙俚。竟陵變益下、潢汙行潦水。惟有五嶺南、特立築堅壘。不受惡風摧、不將古格

改。泰泉振中衰、啓後茶陵似。朱竹垞謂嶺南自南園五先生後風雅中墜得南園十子功、抗風

強到底。一事更流芳、論文存終始。李何有慚色、搏沙答搖鞞。何景明詆李搖鞞振鐸滄溟絕

茂泰、李攀龍與不入南園裏。悟此可談詩、行誼風人旨。器識先文藝、枝葉輸根柢。漢魏唐

宋來、此義誰能毀。轉念到西菴、題畫獄冤死。彷彿高青邱、上梁文同罪。高青邱爲魏觀在

昔專制朝、君權蔑人理。時代轉急輪、元音當變徵。怨怒救哀思、溫柔成委靡。抗風名永懷

、責歸豪傑士。努力創新基、寄情弔遺址。天未喪斯文、亂定存詩史。登高望中原、南風吹

萬里。

得此題時、原想寫七律一章、既而思潮洶湧、乃寫五古、憶及朱竹垞先生之言、謂明代

三百年詩屢變、獨閩粵風義始終不易、蘭汀雖小變、而歐伯禎黎維敬輩、猶五先生之遺

調也。因知南園地位不特在嶺南足以自豪、在明代三百年中亦足以睥睨中原矣。不覺寫

成三十餘韻。明代前後七子中、北地信陽齟齬於前、歷下四溟絕交於後、文人相輕之惡

習、大雅所痛心、而南園十子幸免之、有此更足以稱美。於是全篇意境、蘊蓄胸中、以人格奠定詩人風格、以南園涵蓋有明一代詩史。詩大序云、亂世之音、怨以怒、亡國之音、哀以思。欲免哀思、不能避怨怒、溫柔敦厚、盛世之音、不足以振頹風挽劫運也。文學當適應時勢、詩亦何能例外、附志數語、以質同社諸公笑謂何如、憲子附誌。

金墉城

閱盡興亡感百端、權威不在帝王冠。漫談兵戰爭劉石、倘有神知惱懿瞞。北斗天牢人未貴、降幡軹道敵猶寬。永昌宮後瑤光寺、憑弔於今祇斷垣。

贈陳荆鴻

十年壯志感歸舟、惜惜菴中大九州。舊有家風承獨漉、近聞師說得天游。嶺南何處翻多問、海外勞人總未休。爲念國微宵雅廢、定應詩思更清遒。

登澳門松山新亭

朝暎出沒海雲間、鬱鬱孤松鱗甲斑。東北幾時仍重鎮、西南無地可移山。燬師經略名猶忌、失路英雄悔已難。異域新亭資感慨、不堪回首望青灣。

感舊三首

香江感舊不勝情、政論當年筆陣橫。未忍衆生淪大劫、敢將正道指群盲。時移功罪當明白、地動川原況震驚。閱歷已多平意氣、祇今仍是有觚稜。

香江感舊不勝情、綺事兜心夢寐縈。夜半石塘看月上、樓前海岸吸風生。不辭綠酒供酣醉、亦指蒼天證誓盟。記閱姻緣翻案簿、問誰顛倒誤年青。

香江感舊不勝情、四十年中念死生。政敵有時能釋憾、富豪無限已長暝。應知末世同災劫、何苦偏心事妬爭。野魅天魔狂舞後、幕終仍要現人形。

自題小照

不露驕容不象迂、稜稜風骨貌清癯。於人猶憾難爲佛、故我依然總近儒。憂患久經羸髮白、文章失用悔心粗。行年七十忌將老、抖擻精神讀異書。

讀范文正公集

後樂先憂願、千秋誦至言。才輸荆國大、名媲魏公賢。制敵籌邊策、安親贍族田。丹陽遺集在、時讀兩三篇。

讀易

伏羲畫卦文王重、爻詞之作非周公。東漢經師倡異說、二千年來爲欺蒙。明義先尊司馬史、卦爻象象皆孔子。十翼無稽當掃除、能正源流定宗旨。漢代焦京始著魔、納甲爻辰蕪穢多。河洛圖書陳邵演、方士道士蔽同科。懸象著明觀日月、動變吉凶存辭說。上追過去貫將來、行健自強無絕滅。元亨利貞其詞同、六四卦藏七卦中。此義精微應萬變、可惜諸儒尚著空。說理樸實推程傳、動不游移變不亂。破碎非時玄亦非、象數燦然經可玩。我曾讀易自得師、縱爲卜筮豈支離。不告小人明是非、終身寡過深研幾。

碩果社二百會雅集即席賦詩拈得眞字

詩社連開歷九春、會剛二百值今辰。期頤再度人多壽、亂世頻經筆有神。無害文詞尊大雅、互知情性見天真。千鍾敢盡豪猶昔、管領風騷不避秦。

花朝

仲春草木皆澄鮮、繽紛紅紫何娟娟。人言百花此生日、誕生同日何偶然。況云十二或十五、洛陽荆楚分後先。惟有嶺南地氣煖、菊花長傍東籬邊。芭蕉不謝柳長綠、竟與桃李爭春妍。爭奈寒梅已結子、池塘荷葉方田田。豈知草木有本性、各順其性存乎天。同時生日似背理、

齊東野語空流傳。且看陽春九十日、屢更花訊安能兼。君不見佛本愛花仙愛酒、天花亂墜維摩前。我疑天地有真宰、固遣繁花盛放皆芊綿。供養無量百千萬億佛、頓使閻浮世界成莊嚴。彷彿一花現一佛、衆香界裏香同沾。願祝衆生免歷劫、不枉春色今平添。

謁會稽大禹廟

異代靈祠鎮故山、撬舟曾歷九州還。龍歸大澤成霖雨、虎踞荒岡竄百蠻。幾度謳歌傳海內、八年御宇在人間。會稽遙接蒼梧野、虞夏皇圖未可攀。

登澳門松山

吁嗟片土成胡越、四百餘年等甌脫。惟有荒山萬蓋松、老去未忘明日月。登臨策杖晨光開、東望汪洋何壯哉。風帆出沒渺無際、群鷗浩蕩飛復來。江山信美圖難畫、惆悵年年滄海客。曉風迎面露沾衣、煙嵐驟散晴空白。一時蒼翠出塵表、四顧茫然衆山小。憐此騰拏樹樹奇、森羅不盡成冥杳。槎枒喬木今重睹、錯節盤根仍守土。海濤同作不平鳴、拔地參天自千古。

柬湘父

森森萬木尚滋榮、風雨樓頭夜有聲。大老傳經留伏勝、諸生祭酒奉荀卿。休驚洪水能沈陸、但擁群書可作城。天道迴還人待變、月明滄海照雙清。

題朱九江先生畫像

一代興亡關學術、草堂風雨憶先生。尚留不死精神在、相對如聞警效聲。貌是莊嚴同佛祖、氣猶溫厚見人情。畫工傳妙揮神筆、似伏詩書鎮亂兵。

讀陳文忠公年譜

半紀春秋遭末造、誅閹抗疏早成名。可憐殘局扶新主、敢惜餘生縱敵兵。知命自安臣節盡、編年公付史家評。文章勝讀雲淙集、事比空言見著明。



歲晚

歲晚憶兒時、日計迎新歲。治亂兩茫然、不惜光陰逝。及壯走四方、體健精神頓。忽忽渡除夕、十年分十地。垂老欲稍息、自悔太聰慧。匪關衣褐無、邊外寒風厲。篋藏書百篇、正待靈光祭。讀後憂交集、酒酣人不睡。獨立撫蒼松、貞元思未濟。

酬黃偉伯

大踏步來何坦蕩、九龍塘裏一頑仙。得天獨厚精神足、與物無爭頭角圓。息影菟裘游欲罷、等身詩稿世堪傳。破除崖岸空城府、福壽雙歸豈偶然。

酬李鳳坡

亦儒亦賈亦軍人、恰似坡仙百化身。早悟禪機歸淡泊、克全友道助精神。義山才調原無敵、思訓丹青自有真。記否當年曾共事、梅花風裏挹香塵。

寒夜與友人對飲

多年不飲酒、心事轉寧靜。今夕喜逢君、對酒如對茗。本非貪杯人、未遇賞心境。只爲三冬寒、寂坐終宵永。詩人舊風習、酒城爭管領。醉時辯驚筵、狂時冠不整。我與君獨異、多言吐骨鯁。不問量有無、自節心常醒。三杯情未完、一觥溫欲冷。人物盡談資、世界當前景。莫逆兩心通、笑視雙眸炯。談倦夜將闌、銀河星耿耿。大地好江山、倒入杯中影。

秋懷

鬱鬱孤懷困不舒、故園草木失扶疏。漸忘兒女春歸事、肯傍龍蛇大澤居。萬里投荒尋笠屐、幾人爭地借犁鋤。童時尚憶秋聲賦、夜起挑燈讀異書。



仲珮先生遺照

仲珮世丈大人象贊

守先儒業	具赤子心
九江薪火	簡岸規箴
腹笥萬卷	學海千尋
咳唾珠玉	談笑古今
撫髯把盞	淺唱低吟
立言不朽	山高水深

一九九五年秋月

世愚姪何

叔惠拜謨  
幼惠敬書



九江薪火

伍仲珮

先生別署學宣、鄉籍勒流、與兄學勤同游簡竹居先生門下、專志經書之外、復研習醫學、對傷寒論尤有心得、曾任廣州愛育堂醫席多年、後移硯香江仍懸壺濟世、膺仁者爲有壽之徵、乃年逾八十仍精神矍鑠、以儒醫名世、復不廢吟詠、詩與事略見公元一九五五年南海李鳳坡先生倡印之現代詩鈔及一九九五年先生之姪宜孫絜宜昆仲刊存伍仲珮先生詩文存。

和紅杏軒主論傷寒

醫學源流仔細看、長沙著論揭傷寒。六經剖悉陰陽辨、百病先防津液乾。韻伯條分存錯簡、容川補正釋疑團。宋元諸子多偏駁、食肉何須食馬肝。

次韻和伯典雜感二首

坐食不耕誚素餐、飴羞十畝桑者閑。有時感觸聊吟詠、無謂應酬且節刪。錦繡河山成咫尺、蹉跎歲月老朱顏。自知梗介難諧俗、一任他人笑我頑。

又

鑑峰珠海往還稀、尺素常通更有詩。群輩誰堪傾肺腑、此生自問愧鬚眉。居夷豈便忘中土、活世那知飲上池。國事蝸蟻何足道、懶將倦眼看殘棋。

余少飄世兄以近七律書扇見贈次韻謝之

大地烽煙空障塵、勞生應歎不逢辰。時艱日亟誰階厲、暑令初臨更惱人。雅扇分貽情誼重、佳章親繕墨痕新。仁風遠被偏先我、到處常教一室春。

送繩姪赴美遊學

蓬矢桑弧射四方、男兒壯志奮高翔。進修每日勤三省、珍重前途勸一觴。此別望窮千里目、相思縈繞九迴腸。今朝破浪乘風去、喜見毛錐穎脫囊。

劉君星昶以感時七律二首見示次韻奉和

休嗤阮藉歎途窮、我亦飄零一老翁。田舍荒蕪瑣尾後、煙塵迷罔亂離中。神州莽莽遭糜爛、天道茫茫若曠曠。舉目幾無乾淨土、泯棼堪慨萬方同。

又

蒿目時艱敢自安、閒吟未遂且憑闌。故交零落知音少、大地淪胥託足難。顧我久無軒冕志、逢人任作布衣看。與君共篤維桑誼、各抱冬心耐歲寒。時劉君任順德綿遠堂主席該堂在香港爲最早僑團創立於公元一八七五年

丁亥春日吟

花甲還添十四春、河山景物幾番新。鑪峰鏡海留萍跡、野鶴閒雲伴此身。祇有鄉園牽旅思、不隨流俗汨吾真。世途變幻伊胡底、願作優游自在人。

送憲子入京拙作劉君嚴菴見而和之因疊前韻

孰使中原歎陸沈、江山無意復登臨。終軍未遂請纓志、荷蕢深知擊磬心。八載備嘗倭寇虐、萬方同盼傅岩霖。瘡痍滿目伊誰責、願把膏肓痛下鍼。

次韻再和猶齋

同是流離瑣尾人、爭如草木尚逢春。此生莫覩昇平世、差幸猶存矍鑠身。敵帚自珍惟守舊、殘篇獨抱不趨新。溯蒙主鬯揚先德、祇恨無能荷析薪。先祖入祀孝弟祠時由猶齋尊人主祭

夢四弟

休云說夢是痴人、夢裏分明見到真。容貌依稀曾記取、語言問訊帶吟呻。我留弟去幽明隔、死別生離惱恨均。老母長兄兼阿嫂、夜臺仍是一家親。

勉姪婦何曼原學作詩文偶成五絕一首

天地有中聲、文章本性情。胸中書卷足、筆下自縱橫。

綠園詩稿

綠園詩稿

伍景英

先生自署綠園子、鄉籍勒流、生於清光緒庚寅公元一八九零年、幼從宿儒馮明菴何達公二位習禮學詩、夙懷大志、公元一九零九年畢業黃埔水師學堂、旋負笈英美深造、於公元一九一七年獲任美國朴資茅次海軍船廠要職、後應召回國、出任廣州海軍造艦總監兼士敏土廠工務處處長。著有造船理論約四十萬言、部份由北京國防工業出版社出版。先生退休後移居澳洲、歲月悠游、至公元一九九三年仙逝彼邦、壽一百零三歲。先生畢生狷介自持、雅好吟詠、積稿三百餘首、惟向不以此自詡於世、至公元一九八八年始徇其令姪伍宜孫博士之請、在香港付梓、流傳中外。伍博士並爲文以序之。

詠史百首錄九

隱諱難爭死後名、平陽說有囚堯城、讓王塚失蒼梧野、何姓朝廷不血兵。

又

羽山燕子語喃喃、度土功成笑苦諳、阿啓此時應勿哭、有人流淚到湘潭。

又

治水元勳不可忘、萬年德澤動蒼蒼、雖然錯計家天下、尚得南巢作玉堂。

又

鳴條戰勝有商湯、慚德還推說務光、更薄諸侯誰敢上、萬民擁戴率歸王。

又

殷德雖衰尚未亡、宣傳底事到甘棠、分香賣履彌留意、瀟洒周文遜魏王。

又

七篇孟子論非迂、陳義高明不可誣、若得平心親體會、曠如洪武亦知輸。

又

逐鹿中原尚未休、鴻門庇護究何求、假如楚羽膺天命、項伯封侯亦姓劉。

又

自來英主量汪洋、禹拜嘉言世德光、記室陳琳醫魏武、武墨嘆未識賓王。

又

日月升沉萬古愁、井邊桐葉不勝秋、若教歷史翻重演、辜負前人秃筆頭。

憶入桂林

焚山枉費晉文公、宿鳥投林路尚通、內子望空揮手別、萬家燈火五更風。

勉在外兒子

放開眼界看天下、門左懸弧志已張。莫爲世風輕禮義、須因境地識行藏。四時晝夜分長短、百草青蒼有臭香。豫事在前臨事立、不貪不惑不倉皇。

自遣六首錄三

衡門之下得同心、百事依違爲藁砧、人靜夜長燈火煖、拈針微笑伴清吟。

又

卅年培植小青松、綠已成陰不負公、黃白忍冬花也好、晚風時候正香濃。

又

庭前花發木芙蓉、如此風光恰正衷、客至清茶來當酒、詩情要淡不要濃。

歸田感

巢父一枝尚得安、兒童竹馬共追歡、歸來七十一何晚、綠蔭功成任務完。

又

青燈黃卷共沈吟、蠶吐絲成可稱心、喜見箕裘能繼業、茫茫天地更何尋。

又

邇來三十六年間、夏景秋芳帶笑看、此日主人歸故里、紫薇何故不開顏。

憶亡女四首錄一

可憐劫火已成灰、十斛明珠買不回、剩得影圖留紀念、返魂香入嶺南梅。

哭亡兒夏材四首錄一

無端遭遇意難平、想叩天門作一鳴、石若能言山也楮、淚枯老眼卻無聲。

越王臺懷古

層樓歷劫尚巍峨、山色連雲憶趙佗、陸賈大夫開百越、漢家天子竟如何。

景泰僧歸

古寺堙埋歷劫灰、欲尋遺址認莓苔、當時月下敲門者、何至於今尚不回。

壽內

潦倒塵寰數十年、風吹雨打去如煙。春光照戶非關禱、喜氣臨門要謝天。子女學成蒙帝力、家庭教育賴卿賢。持杯壽爾同歡笑、慶得團圓地上仙。

一九七八年五月四日去國往澳洲是日下午到港有感

臨程去國思紛紛、自笑無如一難民。越俎代庖原仗義註一。辭多受少豈求貧註二。抱關擊柝觀時候。折檻埋輪樹氣氛註三。迴首峴山碑有憾註四。難償天債古人云。

(註一)一九三七至三八年間、工作超出乎位、無法可推。(註二)不接受高薪、寧可捱貧。(註三)到職三日、即與航政局長爭辯、直報知建設廳不幹理由、卒去職、換一新人不久、由交通部接收該局。(註四)受某公知遇正想做些事業不料時勢一變、天債難償。



先生諱節、鄉籍甘竹右灘。年弱冠禮簡竹居門下受業、潛心經史、時當清末失政、不與俗流、乃走上海與同邑鄧實同學等組國學保存會、出版國粹學報、鼎革後歷任北京大學文史教授、廣東高等學堂監督、廣東教育廳廳長等職、公餘喜賦詩酬答或自娛、故當時曾有詩人廳長之雅譽。公元一九三五年一月二十四日、先生以痛感內憂外患、卒於北京、春秋六十二。歿十九年、樂昌張昭芹以先生之蒹葭樓詩與同邑羅惇勳、番禺梁鼎芬、揭陽曾剛甫合編爲嶺南近代四家詩、流傳兩岸之間。

乙未讌集桃李花下興言邊患夜分不寐

春色滿中原、東風忽吹至。繫彼桃李花、笑知酒闌意。古人秉燭遊、吾今獨何志。草堂來故人、爲我道時事。坐花且開筵、芳菲拂劍鼻。草木猶春榮、世運何大異。東望春可憐、千里碧血漬。山高風鶴哀、將軍死無地。泱泱東海雄、一旦委地利。豈無鷄兒軍、不可收指臂。兵事三十年、嗟嗟閫外帥。丈夫拊髀驚、衝冠裂目眦。我少學兵法、亦明古武備。何必怯舟師、何必畏利器。苟得死士心、無敵有大義。天下豈無人、蒼蒼果誰寄。邊風吹蟲沙、霾霧走魑魅。壯士懷關東、舉酒問天醉。花落竟無言、奈何夜不寐。

謁九江朱先生祠

橫流滄海變、屹立禮山祠。接地吾私淑、登堂識本師。九江儒學派、三晉使君碑。不必遺書在、聞風百世思。

草堂留別簡岸夫子

乾坤感高義、小子愧非材。道在斯人與、時危講席開。青山臥龍宅、紫水釣魚臺。別路多風雪、天心數點梅。

丙午九日登龍華塔同諸貞壯鄧秋枚

九日龍華車似水、客中聊復作清游。一江入海渾成瘴、百里無山只見秋。強欲登臨過此日、未須流涕對高丘。茱萸各有鄉關感、難遣天涯共倚樓。

滬江重過羅敷菴歌席中賦贈

五年汝去更何之、又聽琵琶水一涯。雨雪漸多殘醉後、江湖同在未還時。空留異代增蕭瑟、賸有餘生付別離。故伎幾人今亦盡、不須臨老放楊枝。

丁未南歸甫抵家門次兒綬華遽殤吟詠概絕兩月有餘小暑日獨坐海幢寺後園得句

鶴鳴失和祇增傷、往復吟成鬢漸霜。歷覽死生元可了、豈知人世未能忘。荒畦野竹新添筍、落日僧寮已蕪香。平日尋常經眼事、今朝惟有斷人腸。

題陳白沙先生自寫詩卷後

風雨茅龍落筆奇、文章萬古在南陲。荒崖莽莽三忠廟、奇石陰陰一字碑。石在崖山之北刻有張宏範滅宋於此數字先生爲冠宋字於其首我已汎瀾頻掩卷、不堪零落未收辭。休論三百年來事、野馬游塵滿縝絲。

戊申二月十二日過新汀屈翁山先生故里望泣墓亭弔馬頭嶺鑄兵殘竈屈氏子孫出示先生遺

像謹題二首

式閭過里獨徬徨、盡日追尋到此鄉。一族義聲存廢竈、孤臣詞賦痛浮湘。更誰真意紬詩外、不減春陰過夕陽。我愧長沙能作賦、攝衣未拜道援堂。

西北經營似有無、荒原草木待昭蘇。事難語世終多佚、名已從僧且易蕪。著述尚聞傳大嶺、叢殘曾見落三吳。載憑遺像殷殷祝、自有精心在八區。

過靈隱寺見洪楊劫後遺跡

一峰迎日滿清暉、綠瓦紅牆委斷扉。去劫百年猶未復、爛泥諸佛竟誰皈。古無創業殘文教、

水欲分湖湧翠微。曾爲勅題金碧榜、空山無罪亦招非。

己酉春晚典衣購書數十部

典衣原爲買書貧、生事初憐漸苦辛。載籍獨尋還此日、典型雖在已無人。燈前著影添千卷、海壖回寒過一春。已換葛裘吾自計、十年鍵戶敢因循。

曼殊自日本寄畫作風絮美人題爲調箏人繪命之日春愁賦此答之

東海遺書久未裁、殷勤緘札幾回開。三年爲別兼春暮、一紙將愁與畫來。入世娥眉宜衆妙、向人風絮有沉哀。憐君未解幽憂疾、詎爲調箏又怨猜。

庚戌自題簾葭圖寄黃賓虹索畫

愁入蒹葭不可尋、閉門誰識遯洄深。江湖一往成回首、風露當前獨斂襟。遺世尚多今日意、懷人空有百年心。憑君爲寫傷秋句、應與鳴條和獨琴。

十二月十七日偕崔劭南任子貞出東郊過息鞭亭小飲

殘年郊外少遊人、獨愛梅花水石濱。薄酒卻寒成一醉、積陰爲雨計兼旬。生涯舉國愁窮臘、風物萬山得早春。只有吾徒消領盡、寂寥天地似今晨。

辛亥南園詩社重開呈梁節先生

盛時臺笠卻難忘、一賦都人已足傷。高會及來隨老輩、雅歌還得共斯堂。興微國俗詩將廢、俯仰前塵地亦蒼。獨使南園不寥落、參天林木起朝陽。

癸丑四月十二日登舟北發同里諸子遠送江干留別一首

分攜各有中年感、欲別仍留到海隈。一水乍明初日上、晚春纔了早荷開。故園風物尋常過、別夢江湖取次回。攬轡不須期孟博、試論天下可無哀。

乙卯梅殘

今朝寂寂懷江國、獨爲題詩亦意闌。一雪助花消朔氣、無人倚竹共天寒。餘枝偃蹇充瓶活、數樹支持抵臘看。何與空山林際鶴、亦捎零羽斷飛翰。

丙辰生朝早起作

壯士怕題生日詩、起看牛斗欲明時。遽然栩栩如初覺、已矣堂堂亦愁遺。餘事可隨詩并老、世圖應數臘能知。閒身篡取今朝樂、花市城南恐尚遲。

讀簡岸夫子詩敬題

二十年前去草堂、山堂積歲亦成荒、白頭弟子今何說、可與言詩已足傷。節初著籍草堂以詩調評謂可與言詩云

己未十一月初一夜讀秋門遺詩

八卷遺詩有陳跡、廿餘年來尚惻惻。故人骨冷西樵山、不憶京華久行客。開篇一序我少作、中有唱和郊與籍。當時國事已可哀、隱隱詩篇各相惜。自子之死我深居、讀書十載不山澤。豈知出遊壯歲後、懶復治詩困行役。如今衰遲似枚子、江海販書較尤適。吁嗟成就皆莫期、究不若子臥窀穸。如今羨子絕年少、嘔心不讓李長吉。遺詩重讀輒三歎、子若生年亦髮白。乃知詩事令人老、不死相看仍落魄。天寒高齋今夕心、書寄枚子江上宅。

庚申十月南歸過北園茗柯置酒話舊留題一首

故園兵火七年間、夢裏常懸北郭山。壟墓欲依雲自遠、溪塘重過水猶潺。與言野叟疑非世、已倦林鳥識始還。可奈棲棲復行役、慙憑尊酒慰時艱。

辛酉除夕

收盡狂心自去年、餘年甘亦附詩篇。未花梅在盆中活、已敝裘施鞞外緣。春事奈桃看次第、歲朝樺燭語嬋娟。一寒足抵宵來雪、祇負書棚已萬錢。

壬戌中秋夜贈王秋湄時將別

明月照芳池、涼風轉飛蓋。佳期易爲別、人生豔相樂。歸山暮雲盡、在地庭梢落。如何望鄉心、復對欲行客。服賈爾自營、論交義不薄。念我寒無衣、語我舟在壑。誰能守夜半、昧者使昭若。翩翩雁南遊、露下憐栖雀。

癸亥三月十九日發廣州海上作

海上春寒千里雨、未忘炎瘴在南州。隔宵天氣隨人變、作舞蠻歌解客愁。曉日生雲如久暝、遠颿將鳥近旁洲。眼前豈有安民策、多謝群山阻去舟。

甲子秋分瘦公卒哭之以詩

論詩疇昔本尋常、今日回頭輒可傷。十載郡齋相過地、數竿簷竹已成行。老逢國亂君先免、溘至秋分露更蒼。莫說平生康濟願、區區文字恐流亡。

乙丑四月二十五日西山會葬瘦公

午雷飛雹助淒其、天與愁陰入地知。封樹得緣今日長、山花栽了一春期。詩名被塚傷心見、世業成丘達者悲。太息交情祇如此、送君臨穴最終時。

丙寅歲朝

水仙初作歲朝圖、不見車塵曲巷驅。祇爲人情生感歎、放翁原不在屠蘇。

大雪中過社團遇黎季裴出示遲余詞句晚飲酒家賦答

廿年無此雪漫漫、深沒輪蹄上掩灘。入地豔令群勢息、倚天惟見萬松寒。晚來未盡僕僕意、獨往猶尋汲汲歡。得句豈期逢石帚、翠尊紅萼更盤桓。

丁卯病起

病起已過三月三、客來初爲說江南。一生何日生知死、衆亂相尋暴易貪。迄岸萬花盤馬隊、被兵群友斷書函。愁腸欲與春俱去、歸路回頭更不堪。

題篝燈紡讀圖

我生十月孤、廿六母見背。與君生略同、披圖淚先墜。八歲我受書、夜窗燭如晦。我讀輒不忘、母命再促睡。程課樂有餘、縱性答不貸。孤兒今日身、母心當日碎。以君孤苦年、視我尤徒倍。君能體母心、母勞乃汝愛。溫嚴皆母恩、恩狀豈可續。兒兮手中編、母兮機上淚。蕭蕭城北廬、風木作青黛。

戊辰三月十七日登粵（越）秀山

去鄉廿載闕登臨、未盡紅棉此日心。文教滅亡何有地、江山蕪亂又成林。馬行石榜三君篆、鳥嘯蒼崖百步陰。猶許老夫來弔望、舊蹤無意更追尋。

官廨梅花

丹葉黃英已後時、廿年歸客到冬知。尋常不見衙齋雪、多負梅花似雪枝。

己巳澳居雜詩五首錄二

倚闌樹不到簷庭、白日初黃月淡青。樓外是山山後海、人生難得此居停。

一灣水弱不流花、寂寂連山長草芽。五月海風多帶雨、亂飄隨雨過前沙。

濠鏡寄廣州羅原覺

山翠當門且卜居、一年塵事了無餘。意多始覺泉明晚、跡近能令務觀疏。鄰樹鳥鳴同止止、海波鷗沒不徐徐。眼前物我俱難得、回首鄉邦獨累歎。

客樓月下贈別馬武仲

滄海能來問遠人、蔑資凡伯語酸辛。一言見義君於我、有月瞻天斗與辰。鄰耳蝸蟾如沸地、客心鴻雁失群身。樓臺百尺相扶影、只惜泉明未答神。

庚午中秋夜獨遊北海對月作

余意翩翩與月生、月明誰解是宵明。天人消息今成阻、絃望安排化未更。湖艇張歌寥落見、宮鴉離樹再三鳴。悲懷不爲思鄉動、況有微雲繼倚聲。

送唐天如南歸

亂中來見豈尋常、對語經旬別更傷、莫作杜陵歸蜀計、本無人識浣花堂。

辛未十月五夜作

危城昏語夜堂堂、輟講程門有去方、不惜此身亡亂際、北風猶說第三章。

寄越園

北地花爲風雪欺、令人感歎向陽枝、盆梅未有凌寒格、恐負西湖處士詩。

壬申小極後春盡

未殊爲客是春歸、數日東風柳亂飛。行藥出門方遇雨、看花成淚欲沾衣。都人勸樂兵何有、園鳥分來昨又非。不似江南鳴鳩早、燕丘蟲戶始披闥。

哭諸貞壯

歿無赴告病無書、流涕生平痛有餘、未盡話言難再共、百千詩稿更何如。

癸酉二月七日雪

已成春雪不成寒、曷救冬暘土曠乾。遇閏直令花再勒、出關誰與柳同彈。歸馱萬騎翻紅草、舊水無垠沒錦湍。回竚小樓傷遠目、西山如淚落漫漫。

寒食晚飯聊園爲譚篆青題聊園填詞圖

看花倏過廿年期、珍重今年北客詩。咫尺關山成絕國、清明楊柳似平時。聊園舊主腸空斷、寒食春城酒莫悲。容易野塘花落盡、明朝還續稼軒詞。

省垣凶館十五省紀游詩鈔



負暄山館詩鈔并自序

黃偉伯

先生字棣華、鄉籍陳村。生於清同治十一年、公元一八七二年。光緒二十年舉秀才、配室招氏淑卿、亦系出名門。當年流寓香江、在日治時後期、嘗與同邑伍憲子、馮漸達、番禺謝焜彝同組碩果詩社、以遣閒居、頤養天年、因得壽享遐齡、於公元一九五五年歲乙未暮春無疾而終、遺著十五省紀游詩鈔一卷共載詩達一千四百一十三首。

自序云

余編紀游詩既竣、爰爲文以弁其首曰、夫游、本樂事也、而不知苦在其中、何以言之、凡人游歷、必須有強健之腰腳、不畏躋攀跋涉之勞、矯首千仞峰頭、濯足萬里流上、足以極山川風物之大觀、故體力不充實者、不可以言游也。其次必須有暇豫之光陰、不受日期之拘束、可速則速、可久則久、視乎風景之幽深平淡爲去留、故俗冗難擺脫者不可以言游也。其次必須有充裕之川資、免虞費用之短絀、倘蒞一勝境、意外忽逢俊侶、則流連文酒、自多酬酢、若用度不足、便敗清興矣、故資斧不豐厚者、不可以言游也。以上三者、既無慮矣、則又有三勝具焉、一日攝影手機、凡游蹤所屆、無論爲城市、爲山林、遇有奇葩異卉、珍禽怪獸、飛瀑危崖、名園古寺、一一收入鏡中、俾可後來展玩、如在目前、此攝影手機之妙用也。二曰寫生畫具、凡游蹤所屆、每遇風景之區、先鉤其輪廓、以俟暇時成圖、蔚爲紀游畫冊、流傳後世、此寫生畫具之妙用也。三曰日記小冊、每遇山川名勝、琳宮道院、亭榭樓臺、舉凡楹聯碑板之可誦者、一一爲之鈔錄、以備將來自爲記載之文籍供攷索、此日記小冊之妙用也。惜余未習攝影術、於六法又爲門外漢、除鈔錄聯文以外、故所游之地、必紀之以詩、今老矣、不復再出游之想、爰將游詩分省而編之、付之剞劂、分贈親友、聊與影片畫冊、等量齊觀、至於詩之工拙、一任親友月旦之而已。民國第一甲午年九月順德黃偉伯時年八十有三。

廣東紀游二百一十首錄七

順德簡岸讀書草堂春夜

鐙下春蟲鳴、夜坐百憂萃。閉門來古人、遺緒或虞墜。蹉跎一日間、狸沒千秋事。東風翔餘紅、芳草翳深翠、漢經得不殘、宋義豈無備。月明讀書聲、不厭覺清睡。

白雲山夜宿雙溪寺

萬籟無聲月滿天、禪房花木鎖寒煙、涓涓不絕雙溪瀑、風送清音到枕邊。

羅浮山夜宿沖虛觀

東樓窗外雨瀟瀟、抵掌談天破寂寥、卻被蚊雷催我睡、一鐙尋夢到明朝。

增城西菴觀挂綠荔枝樹

得天獨厚露華滋、六百餘年此荔枝、樹已空心猶未萎、來遲恨已過花時。

清遠飛來寺觀東坡墨蹟

峽山古寺瞰江隈、帝子仙靈尚往來、爲看宋朝坡老字、飛泉亭上久徘徊。

弔厓山慈元廟

種族興亡痛至今、胡人猾夏最傷心、空留一座慈元廟、宋室君臣海底沉。

榆林港

榆林港是橢圓形、兩面岡巒作護屏、門狹祇容單艦過、水深一任巨輪停。晝間日炙炎威烈、夜後風吹海氣冥、最喜四時春不老、萬株椰樹葉常青。

廣西紀游九首錄三

梧州有編舟作筏浮於江沿架屋其上以作商廛者他省罕見賦詩記之

自昔蒼梧多水患、沿江商賈筏爲家。四圍牆壁編松板、兩面藩籬護竹笆。直學志和常泛宅、

豈同博望偶乘槎、長繩繫住擎天柱、漲落隨流靜不譁。

梧州戎墟小飲

溯流乘一舸、問俗到戎墟。雀噪蒼煙裏、牛歸落日初。山重宜植樹、江近易求魚。小飲投茅店、陶然意自如。

藤縣

桂東僻縣古藤州、安枕酖眠不盜憂。山徑崎嶇難躡屐、河流暢達便行舟。兒童豈患無書讀、商旅惟知向本謀。人愛按摩成痼習、夜深瞽女走街頭。〈縣城有中學一間小學四間〉。

福建紀游十八首錄三

廈門

八閩通道廈門開、近水樓臺錦一堆、聞說漳泉多海客、年年載寶遠洋回。

鼓浪嶼

海心孤嶼鬱崔嵬、林木陰中道路開、認作桃源來避世、蜿蜒數里盡樓臺。

廈門舟中口占示溫毅夫

同鄉何意又同舟、萬里滄溟一葉浮。氣候難齊晴復雨、韶華如駛夏旋秋。豬肝苦覓風塵老、馬齒徒增歲月悠。數日盤桓杯酒洽、相期著述等身謀。

江蘇紀游一百七十五首錄五

揚州史可法衣冠塚

投身江水葬清流、拚與魚龍結伴游、更比夷齊高一著、不留骸骨在山丘。

揚州平山堂有懷歐陽永叔

遠山揖檻與堂平、照眼螺鬟點點清、誰繼風流賢太守、二分明月領蕪城。

上海新世界遊戲場

繚亮笙歌不夜天、往來裙屐盡翩翩、一年博得繩頭利、半是人間造孽錢。

南京道上書所見

從來佳麗說南朝、賸粉殘脂嘆寂寥、連日道逢諸粲者、無人能及莫愁嬌。

徐州子房山

項羽棄關中、先自失地利。富貴思故鄉、量小非大器。彭城最易攻、豈是奠都地、遂令張留侯、得奏散楚技。

浙江紀游二百五十八首錄九

西湖虎跑寺有東坡游虎跑泉詩次韻和之

野草幽花吐異香、山深五月夏生涼。鳥聲在樹諸天靜、雪影橫空白晝長。即此栖真稱淨域、奚庸避地遁遐方。世無鴻漸焉知味、汲水烹茶細細嘗。

錢塘江干觀潮

越王霸氣已全銷、極目吳山楚水遙、今日錢塘江上望、奔騰猶湧子胥橋。

自寧波至奉化車中作

彈指春光九十過、麥秋天氣蒞寧波。連疆參錯田疇密、夾道嶙峋塚墓多。針射松杉朝旭麗、絮拖楊柳惠風和。一車出沒峰巒裏、紅是山花綠是莎。

舟行舟山群島中

群山橫浸海天長、時見雞鳴犬吠鄉、此即桃源新世界、脫離大陸是非場。

天竺三生石

再世圓觀化牧童、竹枝高唱月明中、三生石上精魂在、始信輪迴說可通。

別雁山作

雁宕多松柏、山山翠色鮮。有坑皆亂石、無澗不清泉。洞裏誅茅屋、崖邊拓芋田。此中堪碩隱、何必定逃禪。

天台華頂寺

群山萬壑盡朝宗、獨踞天台第一峰。雨露家鄉雲世界、仙靈來往絕塵蹤。

浙江衢州南宋孔裔有子貢手彫孔子像恭紀以詩

昔我游曲阜、瞻仰聖人宮。又曾孔林詣、謁墓表敬恭。子貢廬墓處、豐碑屹崇隆。未聞聖裔說、奉祀有南宗。豈意今讀報、原委詳始終。趙宋受金禍、端友孔子嫡裔走匆匆。手捧孔子像、至衢避兵鋒。從茲不北返、似續衍無窮。像爲楷木質、彫刻肖形容。問是何人造、子貢手術工。百世不朽敝、真與鑄金同。可與夷齊像、永鎮浙江東。

會稽謁禹廟

開封曾謁禹王宮、不及稽山廟貌崇。恰值禹王生日日、如雲士女集山中。

安徽紀游四十七首錄三

蕪湖晚眺

江干日落汐痕平、遠岫模糊認不清。忽見漁翁高舉網、得魚歡笑兩三聲。

黃山天都峰

天都峰峻勢參天、惟有蓮花足比肩。日月兩丸拱手摘、雲煙萬丈任腰纏。斑斕碧蘚危崖絡、突兀蒼松峭壁懸。一線危梯通絕頂、新修鳥道感時賢。

黃山雲海

清涼台上卓吟筇、雲海奇觀雨後逢。幻作波濤千百態、填平山岳兩三重。汪洋一片長松沒、

浩渺無垠怪石封。更比匡廬堪賞玩、斯游洵足快心胸。

江西紀游一十三首錄二

日暮抵白鹿洞向吳陶群場長借宿

夙性好游山、鎮日不停足。暮抵白鹿洞、倉黃求借宿。我非徐孺子、陳蕃竟刮目。一榻許枝栖、清談同剪燭。推食復解衣、既煖又果腹。高誼薄雲霄、寧讓古人獨。嚶嚶效鳥鳴、此德銘心曲。

舟過彭澤城下

城垣環繞土山巔、曲折江流過縣前、此地淵明曾作令、折腰不肯即歸田。

湖南紀游四十九首錄五

衡山祝融峰頂觀日出日入

紅日沉西復出東、兩般氣象竟相同、祝融峰頂昂頭立、獵獵吹來刺面風。

衡山黃帝岩有宋徽宗書壽岳二字大逾尋丈

岩稱黃帝紀軒轅、尚有徽宗兩字存、艮岳已爲金寇毀、仍留壽岳照乾坤。

自南嶽市赴長沙公路兩旁夾植芙蓉楊柳風景如畫

朝陽未出一車馳、窗外寒風襲短髭、若使春秋佳日過、芙蓉如幃柳如絲。

岳州洞庭湖

洞庭巨浸接天平、依舊涵虛混太清、獨恨湖濱沙磧起、波濤難撼岳陽城。

黃陵廟

湘人何解忘虞舜、獨祀娥皇與女英。無限傷心斑竹淚、不堪刺耳鷓鴣聲。珮環縹緲來靈爽、俎豆馨香致潔誠。古廟湖南推第一、詩豪過此例題名。《每年六月六日湘人必祀二妃》

湖北紀游一十二首錄二

武昌黃鶴樓

三面澄江繞此樓、曾經一炬又重修、當年崔顥題詩處、劫火消磨字不留。

漢陽月湖伯牙琴臺

三千餘年古琴臺、蘚繡苔封石一堆、俗客但知游鬧市、月湖不見幾人來。

河南紀游五十六首錄三

開封雜詠

聞道河床與塔平、隄防一潰沒全城、開封省會宜遷治、庶免爲魚歲歲驚。

洛陽關林

殿宇崇閎氣象豪、千章翠柏插雲高、倘君欲測公神力、試舉牆邊偃月刀。

又

不稱陵寢獨稱林、足與尼山並古今、後世尊崇關壯繆、欲將忠義激人心。

陝西紀游四十三首錄三

西安孔子廟

廟貌莊嚴復敞寬、參霄古柏似天壇、三年苦旱樵蘇絕、尚幸黔黎未忍刊。

臨潼秦始皇墓

驪山山下一土堆、道是祖龍葬身處、發掘曾經項與黃、摧殘陵寢無封樹。不似周陵並漢陵、豐碑屹屹書文字。土人云此墓從來草不生、想是牧羊兒遺火。焚燒土焦之所致。吁嗟乎悲哉、始皇若早立扶蘇、奚有二世亡秦事。

華山毛女洞

爲逃殉葬出秦宮、毛女終年伏洞中、此洞尚名毛女洞、始皇陵寢早成空。

山東紀游三十四首錄五

登泰山絕頂

懸崖峭壁過重重、扶杖攀躋絕頂峰。漢武已無千樹柏、秦皇猶有五株松。水簾飛舞蒼藤掛、徑石模糊碧蘚封。極目齊州煙點點、長吟天外拓心胸。

洛口觀黃河

治河置史等防邊、歲歲虛糜九府錢。導水誰能師夏禹、尋源空自說張騫。平原野店雲爲幙、隔浦漁家水作田。太息此邦人命賤、每看蟻穴浪滔天。

曲阜孔子廟

師表人倫一素王、推尊至聖是公羊。趨躋四海衣冠盛、祀享千秋俎豆香。魯壁有經逃劫火、杏壇無恙歷星霜。觀光幸慰平生願、遍覽碑林到夕陽。

舟行將至青島

一碧連天水渺茫、群山松檜鬱青蒼。參差樓閣嫣紅瓦、照眼分明映夕陽。

青島賞櫻花

非紅非白豔而清、異樣風姿照眼明。光福梅稱香雪海、此間直可號櫻城。

河北紀游二十四首錄三

拳亂平後重游天津

憶余弱冠時、曾應京兆試。兩度過天津、停驂駐旅肆。是時碧眼兒、祇踞一隅地。斗大紫竹林、市廛相鱗次。掛帆旣南歸、橐筆謀生事。曾不數年間、旋聞拳亂熾。紅燈照城廂、乾坤爲倒置。恥哉城下盟、逼從墮都議。四境闢町畦、八國分旗幟。荏苒二十年、足跡未再至。



邇聞新政興、忽動觀光志。襜被蒞津門、耳目一新異。冠蓋道相望、絡繹游塵騎。滄桑說海田、泫然流涕泗。

清室遜位後重游京師

五色旌旗滿帝畿、隨風飄拂映晴暉。紛紛政客相徵逐、酒國花城夜醉歸。

登八達嶺覽長城故址

堅厚城牆石累成、工程艱鉅令人驚。地形更比榆關險、獨立山頭聽馬鳴。

遼寧紀游一百六十三首錄五

大連郊游

爲愛秋光好、飄然野外尋。聲悲聞過雁、果熟見來禽。菊綻含霜蕊、葵傾向日心。落霞明海角、漸覺暮煙沉。

旅順博物館觀吐魯番遺骸

一千三百餘年久、尚有遺骸未化灰。貳負奇屍差可擬、防風巨骨漫相猜。敗衣掩腹乾如蠟、枯髮蒙頭黯似煤。對此頓增身世感、留名及早莫遲回。

公主嶺歲除日赴長春

天開異景是窮冬、大地茫茫白雪封。原隰化爲湖海樣、高低起伏走銀龍。

過萬家嶺

雀噪枯枝雪滿溝、炊煙一縷起林陬。窮冬景物真蕭索、似筍山頭半白頭。

憶瀋陽庚寅九一八日作

瀋陽餘痛未嘗忘、兩度滄桑夢一場。猶記昔年曾得鹿、豈知今日又亡羊。四郊黃豆空收穫、比戶紅梁鮮蓋藏。秋老荷花零落盡、小河沿上朔風涼。

吉林紀游一十六首錄二

乘獨木舟泛松花江

半生歲月江湖老、雞塞初乘獨木舟。勢似長龍飄浪去、形同快蟹逐波流。山橫隔岸容偏媚、石洗奔湍色愈幽。踏遍遼東無此景、何妨盡日恣遨遊。〈長龍快蟹俱船名〉

哈爾濱與陸語覺夜話

三年不到濱江道、此日重游瑞雪飄。空睹樓臺誇壯麗、愁聞市井說蕭條。大江凍結船僵泊、曠野雲低木盡凋、舊雨殷勤陪夜話、手挑蜂蜜盃中澆。

日本紀游一十八首錄四

夜游奈良古寺

古寺依山築、登臨眼界新。欹松如揖我、馴鹿不驚人。夜靜鐘聲寂、天低月影親。歸來攜一劍、留待壓裝塵。

江之島酒家小飲

彈丸一顆江之島、半日栖遲作寓公。臨水亭臺皆入畫、倚崖松檜自成叢。遠吞山色橫琴几、近吸波光上釣筒。跌坐蒲團閒酌酒、天邊帆影落杯中。

東京

泱泱氣象帝王州、三島英雄一網收。試把兩京相比較、新都博大舊都幽。

徐福廟有序日本華僑當年捐集日幣八十萬圓重修長崎徐福廟看似無關宏旨其實有深意存焉因記以詩

當年徐福去求仙、男女離秦不復旋。國外別開新世界、海中竟得好山川。烽煙寧睹中原擾、似續偏能異地傳。寄語日人瞻廟貌、從今箕豆莫相煎。

香港九龍澳門紀游二百六十八首錄二十九

登香港太平山

巖巖氣象獨稱尊、遠近群山盡子孫。一粟人行裙帶路、片帆舟出鯉魚門、海中風挾蛟螭立、樹杪雲埋燕雀喧。極目九龍平似砥、參差樓閣矗林園。

九龍齋色園

景壓楊侯廟、居然似洞天。送青山作案、浮碧海爲田、風靜花香遠、林深蝶影翩。有人來避世、思學赤松仙。

九龍弔宋王臺

君臣狼狽到南陬、半壁江山去不留、空對風濤揮涕淚、那堪回首望杭州。

屯門青山禪院

青山不與衆山同、木自從龍草自蔥、安得再生仇實父、細描風景入圖中。

元朗觀競渡

乍晴乍雨荔枝天、乘興驅車蒞海邊。恰值趁墟人語鬧、又逢競渡水花濺。山河變幻稱新界、市肆繁榮改舊廛。偶入酒家謀一醉、螞臍肥美蟹脂鮮。

戊寅寒食日同龐麗生龐永紹蘇劍如湯勉予修禊赤柱山

暮春佳節逢寒食、早起品茗兩三鍾。走集東坡松屋內、聯袂渡海乘春風。春風柔軟拂鬢髯、海日已上三千紅。登岸驅車赴赤柱、客分坐立恰能容。沿途山花開爛熳、翠蔓絡樹紛蒙茸。遙睇海中霧氣重、難分舴艋與鱸鱉。灣經深水復淺水、風馳電掣車如龍。俄而赤柱山戾止、下車鱗次相追從。村中屋宇百十棟、亦有樓閣峙蒼穹。長街合掌列小肆、有一酒旗風其中。假得海濱別墅坐、開尊暢飲憩游蹤。解衣脫巾恣談笑、濤聲入耳響淙淙。仰觀俯察鳶魚趣、

生機洋溢浮心胸。希饌豐富嚼不盡、餒餘分給村兒童。飲罷整衣下山去、本欲向西錯向東。策杖徒行二十里、春山如笑媚雙瞳。宋元畫稿繪不到、始知大化自然工。路經石橋跨山澗、下有小瀑流瀼瀼。徑趨澗底暫休息、踞石劈柑潤喉嚨。少焉賈勇再邁步、斜陽明滅照冥鴻。偶詣樵婦乃覺誤、筭箕灣是此路通。路見柴灣墦祭者、紙錢飛舞如飄蓬。剎那度進筭箕市、熙來攘往人洶洶。欲向漁舟購海錯、漁舟出海垂釣筒。旋即打槳九龍去、油麻地上駐吟筇。相攜笑入酒家裏、飛觴共醉玉醪濃。歸家魚更已二躍、雖老未感筋力慵。及時行樂快此日、何必學仙訪崆峒。

同任子貞黃修益蘇劍如招福申招量行游大嶼山

春日偕朋大澳游、乘風破浪御輪舟。長空渺渺疑無地、巨浸茫茫忽見洲。近水酒家魚蟹美、沿山蘭若竹松幽。眼前即是桃源境、何必蓬瀛海外求。

粉嶺蓬瀛仙館

花木扶疏院宇幽、四圍山翠豁吟眸。世人但愛紅塵境、清福誰如羽客優。

澳門天后廟

依山古廟隔商廛、門對滄溟白接天。路曲盤旋繚石磴、林深隱約嬾香煙。岩鐫詩句詞華富、壁琢船型藻采鮮。俯視青洲螺一點、中流盪槳水紋圓。

重到澳門往游三洞作歌記之

戊寅春將半、重作澳門游。泊舟已二鼓、旅邸且勾留。市廛面目改、路政奐然修。羊石遭兵燹、人向此中投。屋宇鮮空隙、煙戶爲之稠。其鄰有三洞、盛名著廣州。曉起渡鏡海、一葉浮扁舟。初游竹仙洞、臺榭已虔劉。亂石堆山澗、瀑布尚夷猶。續游濂泉洞、一水穴中流。水味甜且雋、堪與惠山侔。日暮返旅邸、夜飲酒盈甌。招邀新舊雨、清話共綢繆。翌晨策杖

去、出遊覽四周。行抵天后廟、信步陟山丘。萬頃滄波裏、一點峙青洲。旋向南灣行、綠榕蔭道陬。樓閣對溟渤、風日豁吟眸。倦游暫休憩、晚飲酒家樓。越宿品茗後、驅車北嶺頭。探勝白蓮洞、景較兩洞優。怪石如掌合、一線可通幽。有池湛渟淥、跌足濯清漚。三洞此稱最、詩情畫意收。琢句記鴻爪、留備采軒輜。

日本人毀九龍城外屋宇闢作飛機場

柱杖徘徊左右望、漫天塵土逐風揚。此時鬼哭神號處、昔日男歡女愛場。楊廟幸能延歲月、宋臺茲亦感滄桑。儼然地震新遭劫、滿目縱橫瓦礫岡。

乙酉五月二十一日組成碩果詩社賦呈謝焜彝伍憲子馮漸達三人

天風吹已散、碩果幸猶存。一任滄桑幻、惟知孔孟尊。濂溪蓮繞宅、靖節柳垂門。寧學匏瓜繫、朝朝自灌園。

七月二十五日眼見日軍投降英人接收香港記之以詩時年七十有四

龍城四載作詩囚、飲食興居不自由。往事思量如大夢、一朝解脫釋煩憂。山中日麗扶吟杖、海上風清理釣鉤。老見昇平真幸事、賢於南面作王侯。

悼亡八首錄其一與其八

有序云內子招淑卿與余同庚以微恙突於己酉夏曆九月二十日魂歸紫府嗚呼痛哉

齊眉諧白首、今日忽然鰥。寂寞遺容對、洸瀾老淚潛。奇災三載歷、幸福一朝刪。獨坐思前事、人天隔往還。

又

悼亡心已碎、況值老來窮。壁肖相如立、囊羞阮藉空。桐棺剛一寸、塋地僅三弓。寄厝荃灣處、應能諒苦衷。

香港西區永安公司貨倉火災貨倉上層爲住宅因焚而死一百多人

回祿施威劇可哀、馬棚以後此奇災。屍骸燻灼成爲炭、貨物摧殘化作灰。紫氣高騰衝北斗、紅光倒映澈泉臺。延燒兩日方消滅、善後如何費酌裁。

己丑初春碩果社同人假沙田逸園攝影

九龍碩果社、成立已五年。朋簪初締合、僅得五人焉。倭寇降幡舉、香島熄烽煙。文人漸趨集、聲氣喜同聯。舊雨復今雨、壇坫萃群賢。悠悠閱四載、滄桑幾變遷。絃歌仍演習、杯酒共流連。馬齒日已長、尚爲俗冗牽。萍蹤本無定、眠食各一廛。故能常聚首、笑語共纏綿。己丑開新歲、花木正鮮妍。遲遲春日麗、相約游沙田。逸園板橋上、攝影留鬢髯。彷彿修禊事、繩武右軍躔。擲管述巔末、鴻雪志因緣。

牛角山重拜余東旋妹倩墓

思量往事意悠然、一別人間過十年。君已脫離今世界、我仍躑躅舊山川。松杉未改青蒼色、桑梓猶籠黯淡煙。扶杖重來生感喟、心香潛蕪向墳前。

壬辰三月遷葬荆妻招宜人在荃灣生壙之右賦詩紀事留示子孫

重逢花燭欠三年、卿棄紅塵早息肩。身後幸無兒女累、心中還盼子孫賢。已將肉體歸黃土、料想靈魂上碧天。今日摩挲遺骨殖、儼同舉案對筵前。

圓玄學院

居高俯瞰潭三疊、萬綠松杉作護屏。恐有高人來洗耳、潭邊宜築枕流亭。

寄懷荃灣岑伯渠八音題

匏瓜身世繫山中、革盡簪纓仕宦風。入定不愁來木客、誦經時見侍金童。土花蘚上牆三尺、石髮苔鋪地數弓。佳日清游扶竹杖、泉聽潭下勝絲桐。

青山石隱精舍

地拓三弓築小樓、脫離人境事清修。門前不受經塵擾、檻外遙看碧海流。月到天心明澗壑、雲生嶺頂暗松楸。朝朝念佛參禪悅、嬾替兒孫作馬牛。

甲午三月客居香港重游泮水追談往事吟成六首

青衿著得有何奇、花甲光陰似箭馳、喫飯穿衣成老大、毫無建樹愧鬚眉。

其二

菜根滋味在心頭、春夜哦詩在小樓、八十三年思往事、泮宮池水說重游。

其三

回思芹采泮池時、正是英年未有髭、同案梓林今旅港、香江過從屢談詩。《南海黃梓林》

其四

當年同邑有黃嵩、八十遐齡入泮宮、倘使此君今尚在、鳳城人瑞壽星公。

其五

同案清華與煜庠、後先騎鶴返仙鄉、兩君皆有葭苧誼、難望聯吟共舉觴。南海江清華花縣陳煜庠

其六

自從拳亂廢科場、不見槐花舉子忙、舊事重提堪發笑、好名心事未嘗忘。

佛堂門天后廟

鯉魚門外佛堂門、宋代天妃古廟蹲。風雨蛟螭階下拜、晨昏燕雀檻前喧。悅城龍母堪爭勝、岳渚湘君足競存。誕日年年香火盛、漁民雲集獻雞豚。



# 君子務本

集張公方碑字  
黃維瑄



先生字子實、號欣園、別署水樓主人、又署若虛室主人、鄉籍容奇。生於清光緒辛丑十二月二十日、即公元一九零二年一月廿九日。國立中山大學社會科學學士、以學優登仕、歷任政壇要職、又曾執業律師、會計師、在抗日戰爭時期、參加救亡工作、同赴國難。公元一九五零年偕同其夫人胡韻璈女士移居香江、相將從事教育、唱隨樂甚。先生歷任大專院校及學海書樓國學講席、課餘復以書法授徒、桃李遍於海隅、硯耕薪傳垂四十餘年。至公元一九九三年一月七日病終九龍廣華醫院、子力行、孫辰生、隨侍在側。事略見順德藝文集及先生舉殯日其門弟子新會陳禮源撰之黃老師事略。遺著有欣園講學錄、欣園詩文集。

過九龍宋皇臺公園

負隅而戰似殘棋、草木應爲故國悲。一水已教沉玉璽、孤臺終不豎降旗。龍游江海知何去、塚葬衣冠也可疑。今日園成還悵望、待將遺跡入新詩。

題簡又文編太平天國全史

豈同篝火託孤鳴、草草終難致太平。還恨百年無董史、誰將遺事著天京。閉門述作原經世、訪古辛勤不計程、一手直窻興廢局、石園而後到先生。

周千秋梁粲纓伉儷芙蓉畫展於花園道聖約翰堂

海隅秋日風光好、冠蓋相望花園道。競說女師畫芙蓉、士林視之若瓊寶。女師元是周夫人、系出吾鄉得名早。爲愛芙蓉趨錦城、朝暉夕陰細探討。心慕手追年復年、居然下筆衆傾倒。畫成一笑顧周郎、周郎每爲添麗藻。或補好鳥棲枝頭、或寫奇峰倚晴昊。唱隨如此世間稀、羨煞旁觀亦忘老。因君頓憶芙蓉峰、舊遊處處盡凋草。卓哉此花獨宜霜、託彼幽姿寫襟抱。芙蓉萬朵古曾聞、今欣百軸盡新稿。一堂但見紛琳瑯、盛事爭傳遍香島。

賦贈丙申社諸子

嘉會成今昔、悠悠十四年。寫心期獨往、師古得真詮。身許千秋業、人欽一藝專。日新光畫史、吾道重新傳。

春集志蓮淨苑聽古琴

霖雨崩雲一樣工、朱絃響徹嫩寒中。我來愧未諳操縵、但覺移情有古風。

前題之二

絃外音如釋奠詩、相看莫逆寸心知。越聲此際分明在、恍似西湖入夢時。

觀劇爲仙鳳鳴劇團作

戲作忠奸示勸懲、也如詩教可觀興。重看大漢衣冠舊、回首宗邦感不勝。

前題之二

大地茫茫遍鄭聲、高岡忽爾鳳凰鳴。樂無今古關興廢、願借清歌祝太平。

題李生韶華荷花連屏

李生十七膽如斗、興酣落筆驚師友。是豈太華峰巔生、其下應有如船藕。從來巨幅爲者難、居然出於少年手。遠觀乍覺清風生、一室炎氛盡驅走。使我頓憶西子湖、曲院香飄花十畝。大地今方望雲霓、池上雨聲想歌九。頗欣後生氣蓬蓬、舊游不堪重回首。須知一藝無速成、願君努力更持久。

庚寅七夕錄舊作四首

芳草水東西、春風路欲迷。歸時不覺晚、山與夕陽低。

鄉夕問舟人、吳江將至否。須傍微月中、繫船好沽酒。

木葉迎風下、孤亭傍水開。何時尋舊約、載酒過江來。

古寺寂無僧、山深寒更雨、泉流暗竹中、似覺有人語。

庚寅春日

梨花一樹照清池、暖雪晴風二月時、忽憶小園曾種得、今年應發兩三枝。

偶作

勝絕驚身老、情忘發興奇。座從歌妓密、樂任主人爲。重碧拈春酒、輕紅擘荔枝。樓高欲愁思、橫笛未休吹。

題龍山張丹山水畫

閒來策杖逐山行、快挹天風百慮清、一樣泉流恒不競、無聲詩意即心聲。  
青林紅樹雨爭妍、疊嶂危峰氣萬千、十載鄉關勞遠夢、只今重見漢山川。

吟懷八首

吟懷長恨負芳時、爲見梅花輒入詩。雪後園林纔半樹、水邊籬落忽橫枝。人憐紅豔多應俗、天與清香似有私。堪笑胡雛亦風味、解將聲調角中吹。

幾回山腳又江頭、遶著瑤芳看不休。一味清新無我愛、十分孤靜與伊愁。任教月老須微見、卻爲春寒得少留。終共公言數來者、海棠端的免包羞。

小園煙景正淒迷、陣陣寒香壓麝臍。湖水倒窺疏影動、屋簷斜入一枝低。畫名空向閒時看、詩客休徵故事題。慚愧黃鸝與蝴蝶、只知春色在桃溪。

麝香眠後露檀勻、繡在羅衣色未真。斜倚細叢如有恨、冷搖疏朶欲生春。階前紅藥推詞客、籬下黃花重古人。今日含毫與題品、可憐殊不媿清新。

青帘有酒不妨賒、素壁無詩未足誇。所重晚芳聊在目、可關秋色易爲花。深枝冉冉粧溪翠、碎月英英剪海霞。莫管金錢好行市、寂寥相對是山家。

粉環勻束綠枕檜、裊露差煙巒巒長。卷箔乍驚雙睫健、倚闌尋覺百毛涼。齊披古錦圍山閣、背迸寒犀過寺牆。堪笑數根蒼翠者、強顏加入少年場。

蓓蕾枝梢血點乾、粉紅腮頰露春寒。不禁煙雨輕欹著、只好亭臺愛惜看。隈柳旁桃斜欲墜、等鶯期蝶猛成團。京師巷陌新晴後、賣得風流更一般。

柳墜梅飄半月初、小園孤樹更庭除。任應雨杏情無別、最與煙篁分不疏。比並合饒皮博士、形相偏屬薛尚書。薄紅深茜尖尖葉、亦有愁腸未負渠。

答滋軒文

記從白下識金叟、悠悠往事十年久。霽煙麗景逐欣歡、東西南北忘年友。冒亭鶴仲商漢關穎

舊王孫博心、一時與公並泰斗、惟公重見海之湄、高談世事常疾首。一緘相投還有詩、胸中

塊壘宣之口。聲情激越流水音、淋漓大筆龍蛇走。謂我主講學海樓、立言原孝堪不朽。所譽

過情慚莫當、凜然意氣一何厚。惟公早歲思有爲、文采干霄動辰宿。先憂誰復如希文、畫餅

充飢亦能守。人生志節貴專一、笑彼白衣復蒼狗。今公神完光滿頰、浩氣直欲踰龍醜。潛心

默禱陰氣清、客隨杖履陟鍾阜。從來聖賢薄命多、漫嗟吾道遭陽九。

丙午十二月二十五日立春小集水樓賦示座上

向暖花先降、慶高眼頓明。壺觴一席話、京國卅年情。抵臘花何態、經冬木自榮。詰朝看復旦、應共賦昇平。

庚寅暮春集雙聲樓賦呈諸友

結友慕高義、觀風歷遐荒。萍蹤不恆聚、風雨寧相忘。憶昔巴山夜、清韻何琅琅。奏凱歌出峽、鍾阜挹微涼。相期跨榆關、行止若參商。南嶽雖高曠、舒嘯殊疏狂。風塵路縣邈、擾擾還未央。何意孤島上、共此一甌香。相看餘意氣、慷慨多感傷。世事良難料、視彼滄與桑。

餘春尚妍麗、中心自堂堂。勿復嗟離憂、且共裁短章。

冬日小集寒齋示座上

我於富貴浮雲輕、平生襟曲吁難名。宣心賴有管城子、相知伴我肝膽傾。興酣或覺天地窄、歛氣時亦臨黃庭。聊從所好災千紙、有如五斗方解醒。或因即景寫懷抱、微吟羞作秋蟲聲。猶記桂林好山水、嘉陵江上風月清。一從出峽下吳越、又駕飛車關外行。南船北馬增客感、悠悠不覺華髮生。差喜良朋散還聚、相看眉宇何崢嶸。即今斗室樂觴詠、猶似青溪尋舊盟。又如書窗共寒夜、暗香和月疏影橫。青燈回味一何趣、偶同歡笑杯莫停。海隅日暖春復近、紅梅已自相笑迎。嗟余故籍付秦劫、只餘師友無限情。願借詩豪畫師筆、一寫桃李爭春榮。

畢業諸生索詩賦此勗之

我聞孫卿言、爲學不可已。窮年學莫殫、德智須兼美。稽古盛簡編、道藝多所紀。群經著微言、百家各殊旨。悠悠數千年、彌綸在諸史。學海渺無涯、斯言良有以。吁嗟爾諸生、質美若蘭芷。多聞博萬邦、遠志邁蓬矢。三年云有成、我心胡不喜。獨念丁時危、文考競譎詭。多歧悲亡羊、橫流甚洪水、勗哉慎所趨、任重期萬里。大道本尋常、行遠當自邇、平治先修齊、仁自親親始。葛藟庇本根、餅罄疊之恥。舊學待商量、進德安可止。毋矜涉獵多、太倉一粟耳。禮云尚觀摩、孟言病舍己。務本益以謙、閑邪庶有多。

爲鄉士何叔惠題雙薇館讀書圖四首

本是詞林宅裏人、山齋今寄苦吟身。故園寧忍輕離別、只爲當時要避秦。  
丹青詞筆兩相輝、花影參差燕燕飛。堂號歸來傳逸韻、即今未必邁雙薇。  
十里松風入座清、鳴泉遙聽讀書聲。梅花若使迎寒發、東海那禁物序驚。  
惜花心事憐元九、我愧知音白樂天。畫裏有人呼欲出、當門雙樹最娟娟。

雲波詩稿

黃芸博

先生字雲波、道號贊因、鄉籍待考、晚年入西樵山雲泉仙館修道。事略與詩章見南海余少  
編之廣東歷代詩鈔卷七。

海幢寺懷古

趙家年代郭家園、乃宋朝遺址金屋銷沉見佛門。肯讓訶林稱碩果、誰令閬苑阻重閭。普同塔證  
浮生夢、塔高尋丈在園後處為松雪堂迷舊爪痕。贖有江流恣憑弔、不平聲逐怒濤翻。

芸香寄廬

黃香林

先生本名熾芬、鄉籍容奇、生於公元一八八一年。早歲曾任岑公學呂幕府、旋歷任弘毅、  
劍雄小學校長、作育英才、名重鄉邦、畢生青氈自守、乃歿於公元一九六八年秋、身後惟  
以詩詞傳世、遺著芸香寄廬。事略與詩詞由同鄉岑文先生見寄。

公元一九四六年教師節調寄滿江紅乙闋

擲管填詞、慶今朝教師佳節。讀報章、連篇笑話、英雄氣結。柴米光陰捱未了、盤餐苜蓿旬  
三歇。話西江、活鮒總成空、徒饒舌。案頭硯、磨穿鐵。薪俸薄、賒兼折。嘆傷哉貧

也、逼人咄咄。想學敬師齊餉米、同心又怕嗤饕餮。問何時、寒士盡開顏、豐津貼。

春宴即事

節屆中和到酒家、憑闌遠眺散餘霞、天教萍梗縱常合、人比竹林數不差。酒席重開期有約、  
詩筒各負債無餘。柳梢掛上如弓月、又會騷人醉杏花。

自題小照

同周花甲廿年強、把臂垂髻入醉鄉。與我胸中多壘塊、問君眼底幾滄桑。束裝待聘心猶壯、  
伏櫪投閒願未償。不合時宜顏駟老、相偕息影各潛藏。



九列先生



革命四大寇合照  
(一八八八年十月十日攝)

楊鶴齡

孫中山

陳少白

九列

小園詩存

尤列

先生諱季博、字令季、別字少紉、晚號鉢華道人、公元一八六五年出生於原籍北水、公元一九三六年病逝南京寓所。先生幼受業於同邑宿儒陸南朗門下、篤志古學、慨然受湯武歷史意義薰陶、早孕革命思潮、遂懷大志、遍遊大江南北、以察大勢。至北京、乃曾游於番禺名儒梁杭雪門下、以廣其學、及求學於廣州算學館、夤緣而獲交孫中山先生、嗣與孫中山先生之同鄉楊鶴齡新會陳少白往來於廣州港澳之間、同道相謀、漸趨緊密、當時乃有四大寇之稱、旋創立興中會而同盟會、網羅志士、共圖大舉。嘗亡命海外、日本、南洋各地、向華橋鼓吹反清運動、歷入死出生、屢敗屢起、終而大功告成、肇造民國。先生功成而身退、以編著爲事、力闡孔學倫理之道、詩以言志之雅、遺其餘年、因常以在野之身、憂懷國是、畢生以服膺孫中山先生之爲人而爲人。先生卒五十周年、公元一九八七年、其嗣孫男嘉博編纂尤列集一巨冊、備載先生之世系源流、一生功業言行著述、內括小園詩存凡七十餘首、並附年譜、刊於香港。

書懷

男兒立志出鄉關、志不成時誓不還、埋骨豈惟墳墓地、人間到處有青山。

庚子暮秋上野以生芻一束文歌九疊敬弔於西鄉翁之遺像

中原噴血老潛龍、奉以生芻釋大同。嗟我聰明遭鬼瞰、如公氣象竟天雄。最難司馬家陳涉、誰復文犧禮亞東。萬里蒼茫歌一曲、蕭蕭楓葉滿山紅。

星洲秋夜

羊石星洲一樣秋、怯涼爭似海珠頭。早齊物我忘生死、敢爲飄離怨病愁。急雨乍聞千瀑瀉、好風剛戀半衾留。年來自笑真蓬梗、北海南溟盡泛舟。



牡丹爲牡丹校書索題小幅

國色天香久擅名、三千叢裏認卿卿、誰人解唱清平調、坐看春風滿畫屏。

又

昔年我住鳳城隈、上苑花枝次第開、一事至今留夙恨、當時未折此枝回。

仲夏之望與陳孟玉出都夜同逆旅賦此贈之

紅日西沉野爨煙、輪蹄勞我尚遑然。不堪回首京華裏、聊擬談心塞草邊。點點疏燈全彷彿、聲聲長笛自纏綿。與君纔過盧溝水、萬里南歸月滿天。

獄中贈諸將事緣一九零八年鎮南關與河口之役撤退時入越南境爲當時法人所拘留

諸公回首故鄉來、戰馬嘶鳴徹地哀。如此籠城真勁敵、從今面壁已彫材。銀鐺現勢身邊贅、金甲當年劫裏灰。試聽寒蟬寄無賴、頭顱搔遍感徘徊。

湄南寄從弟焯南

傷哉遠別蔽黃雲、一雁南飛日正昏。每至餒寒饒悟道、不勝離合便成文。頭顱已許荆軻借、身手誰同項羽均。獨立江干起惆悵、萋萋荒草匝微塵。

倦遊返國遣興歲壬子

卅年重返最高枝、景物萋萋有所思。是處樓臺仍甲帳、舊遊蕭寺長辛夷。詩人可比遼東鶴、多士群歌梁上雌。自撫頭顱堪一笑、倩誰留得到今時。

庾北樓題壁

南邦雄鎮峙層樓、全粵風光眼底收。遠望虎門煙樹晚、下窺鴉背海天秋。感時共聽銅壺滴、懷古空嗟鐵索浮。樓閣夕陽生暮靄、仙翁何事不回頭。

送鄺君歸國

與誰杯酒說奇窮、借得春風送海蓬。人道傷心在離別、我云如夢較惺忪。前途波浪占都靜、故國榛蕪恨未空。歸看刺桐花正滿、孤高無礙是英雄。

去國行

去國復去國、吾行何遲遲。豈伊有留戀、屏營意在斯、既不懷朱紫、夫何亦孜孜。富貴非吾願、區區安可知。

驅車出國門、舉目愁我眉、胡爲愁我眉、淚爲生民滋。冬煖兒號寒、年豐妻啼饑。去國復去國、去去從此辭。

道左有奇樹、密葉垂芳姿。不見培其本、徒見折其枝。昔我培本計、慚愧無能爲。去國復去國、吾行何遲遲。

庚戌臘（一九一零年）暹京同僑日報停版作

密點濃圈一樣填、算來填過萬千千、何期文字收功日、老我光陰又一年。

珠江即席

但逢對酒怕聞歌、絲竹中年感慨多、人事風花三十載、幾重桑海一西河。

又

孽海迴瀾未有期、煙花如夢總迷離、可憐歷歷遊仙會、多是黃梁未熟時。

又

綺羅金粉鬥年年、花氣氤氳鬱暮煙、一樣銷金留大窟、錢塘江畔海珠前。

登鎮海樓

鎮海樓高鎮海東、閒來憑弔此臨風。江城尚帶君王恨、花影難留美女容。有志故人嘗請劍、傷心高廟竟藏弓。臣佗古碣今何在、嶺表曾誇命世雄。

先生諱熊鏗、鄉籍桂洲、生於公元一八八一年、卒年未詳。畢業廣東高等師範、北京高等文官考試優等、歷任中山、勤勤、廣州、國民各大學教授及廣州、香港各大報社編輯及撰述。爲南社廣州分社社員、遺著有借隱移詩稿。抗日戰爭時流寓香港、曾執教西南中學、事略見廣東文徵續篇、詩見中山大學出版社南社研究第五輯。余少飄編之廣東歷代詩鈔及桂洲詩社出版之桂洲風物記。

粵社第一次雅集六榕寺拈韻得廣字

二月春陰寒、南國草初長。願言思君子、風雨懷孤往。衆芳未搖落、楔事遲蘭漿。望古一遙集、雅歌還慨慷。座有滄海君、高義凌雲上。洸洸師干寄、護法來龍象。裙屐多名流、太邱道何廣。台笠緬盛時、前修興俯仰。豈無今昔觀、頓作人天想。高詠不可聞、流風有遺響。遙遙千載期、惻惻寸心賞。寧知滄桑中、淑氣回吾黨。

殘春日食影如新月越社以蛾日命題

浮雲白日蔽中原、陵歷三辰有數存。剝極微陽猶見嫉、顰餘八表已同昏。雙鸞待月哉生魄、斜照銜山淡掃痕。欲掩愁妝惜春暮、斷腸煙柳足銷魂。

重履北國憶黃晦聞先師

廿年北國論詩地、山館重開試午茶。暑氣初晴足蔬筍、亭林獨坐憶蒹葭。風餘畹晚還扶荔、世事官私且聽蛙。二十四娘碑在否、馬槽軍竈讓昌華。

失題

桑麻雞犬恍前遊、廿載重拏訪戴舟。骨肉一家懸四地、烽煙橫海逼高秋。蘆中窮士憑何報、葭際伊人信可求。樽酒忍言天下事、菰蒲深雨泊輕鷗。

落花詩稿

胡廷燮

先生字伯矩、號遇安。鄉籍桂洲。父積田、清末茂才、庭訓之外、遊學日本、歸國設音樂研究所於廣州、旋回里興建女校、開風氣之先、所居金雪軒、富園林之勝、黃晦聞潘幼執胡伯孝常客其家。女韻璈、爲女師、妻同邑黃維琚、唱隨彌篤、畢生相與從事教育。事略與詩章見南海余少飄編廣東歷代詩鈔卷五。

落花四首

可是仙人萼綠華、裁紅散出影橫斜。懷春空寄相思草、墮溷誰憐解語花。斷雨淒迷連楚岫、故宮零落憶吳娃。從今洗盡鉛華跡、留得香魂傍水涯。

靈根曾否植瑤池、劫歷紅塵只自知。綺院琴樽人去後、小樓風雨夢回時。汪倫此別消魂盡、崔護當年識面遲。試話離懷誰最苦、殘紅泣遍杜鵑枝。

霜滿繁枝月滿林、重薰簾幕玉鉤沉。珮環聲斷三更夢、萍梗蹤馳萬里心。青塚竟憑埋豔骨、綠章誰乞護春陰。桃腮柳眼各無賴、似爲飄零恨不禁。

簾前苦雨太潺潺、枉我金鈴十萬環。已分飄零成浪跡、除將因果証蓬山。遲遲有約春歸洞、寂寂無言晝掩關。鳳泊鸞飄都不管、閒愁盡付酒杯間。

春風餘韻

胡兆馨

先生字仁陔、鄉籍待考。乃清末諸生、任方言學堂教席、民國後改任兩廣高等師範學校教師。事略與詩一首、見南海余少飄編之廣東歷代詩鈔卷十一。

題高鳴謙自畫鸚鵡詩扇並和其韻

靜鎖深宮曲檻邊、情魔底事日相纏。寒宵落月憐孤影、流水桃花又一年。眞賞幾曾逢市駿、能言何必學啼鵑。羽毛漸鍛終當奮、舞鏡爭看只目前。

世德堂詩聲

胡景石

先生諱慶、鄉籍桂洲外村、公元一八九九年生於原籍祖居、畢業廣東公立法政專門學校、爲粵東法律界前輩執業律師、有聲於時、退休後隱宅濠鏡、閒來吟詠、偶亦作畫、春秋佳日、常往來鑑峰山下、雅會故舊鄉誼、共話桑麻、只談風月、晚年老而彌健、矍鑠瀟灑、若地上行仙、公元一九八七年二月八日以遽感不適、在澳門鏡湖醫院與世長辭。事略詩章見鳳嶺僑聲第四十五期及第五十期、何竹平主編之順德藝文集。

壬戌仲秋香港順德聯誼總會屬校同人慶祝

孔子先師聖誕大會應約赴席賦此紀盛

大哉孔夫子、嶽降尼山中。生而具聖德、進而求大同。多能由天縱、事理無不通。任魯大司寇、爲政秉公忠。列國尋周遊、道大世難容。棲遑席不煖、拯溺志尤洪。歎鳳因德衰、傷麟知道窮。杏壇爰設教、弟子三千從。誨人恒不倦、至道傳中庸。刪詩定禮樂、萬世歌豐功。二千五百年、德溥洵颯颯。仲秋逢聖誕、港島沐休風。晚霞何絢爛、燈色如瞳矐。濟濟一堂衆、鞠躬行禮隆。

順德聯誼總會李兆基中學開幕

文教初基奠鳳城、明倫堂下滿書聲。松風十里青雲接、化雨千秋麗澤平。袞袞諸公培後輩、莘莘學子奮前程。葵涌鬢宇今開幕、海外爭傳我邑名。

乙丑餞臘月宮酒樓未赴寄謝昌社諸君子

東邀餞臘感深心、拜讀陽春白雪音。兩載未嘗親雅教、一年將盡和高吟。華筵嘉會機仍失、花市風光景未尋。遙祝月宮賓與主、明春勝事有如林。



景石

松竹留因夏溪山  
 去為秋久廣白雪  
 詠更度采菱謳縷  
 玉鮐堆案團金橘  
 滿洲水宮無限景  
 載與謝公遊

宋袁陽荅溪詩

胡景石 時年  
八十四

畫虎題詩

胡藻斌

先生字顯聲、號靜觀樓主、鄉籍多浦。生於清光緒二十三年、公元一八九七年、少隨伯父錦清公游學日本、同在京都市立美術工藝學校、習西洋畫法。錦清公原善丹青、工花鳥、因得中西畫法同參、致力繪事、藝乃大進、而尤以畫虎見長於時。公元一九一一年回國、先後與同道者在廣州四牌樓設若愚畫學研究社、在光塔街設如是美術學校、循循善誘、以廣游藝。先生性情磊落、復富憂國憂時思想、雄心萬丈、出洋考察、乃遍歷東南亞各地、歐洲、南北非洲、歷時五載有餘、始滿其交流藝術心得、盡其向外中外人士宣揚中國之歷史文化、載譽而歸。乃先後加入南京中國美術會、上海中國畫會、天津藝風社等、共同發展國粹、藉此引導年青一輩走向高尚清操、不流俗習、以有助於德教之風行、端正人心。旋遭盧溝事起、烽火遍天、因襍被南返、一度棲遲香江、及斯地亦淪日敵之手、遂挈眷冒險、輾轉而赴重慶、不料途經開平、遽染暴疾而卒、時公元一九四二年九月十八日、彌留時、仍切切於懷、以効忠國家勉勵其同行子女。夫人伍惠珍於悲痛之餘、尤幸得天之佑、攜同子女及先生之遺作、安抵重慶、以竟先生之志、並得將其遺作、次第展於桂林、柳州、貴陽、重慶、成都諸地、以顯現先生之精神浩氣。公元一九八六年胡夫人爲紀念先生之一生盡瘁於一藝之專、乃將其心血結晶所得而存者、都成一卷、名之曰胡藻斌畫集、刊於香江、以傳萬世。事略並見於中山鄭春霖編輯之嶺南近代畫人傳略。先生詩作不多見、僅錄自其畫集內所題贈之一首。

戊寅雙星銀河再渡之夕寫於宋王台畔贈博文仁兄畫虎

一嘯風生百草枯、陰霾消處見於菟、眼中頗覺妖狐靜、不道相看是畫圖。

一嘯風生百草枯  
枯陰靈竇屢見於冕眼中頗覺妖狐靜不道相看是畫圖  
博文仁兄名畫序  
茂實殿星銀河弄瓊之夕  
燕斌寫於宋王台



六二 一嘯風生百草枯（漢雅軒藏）



胡漢斌在南洋大霹靂埠為孫中山先生雕刻石像



覺民吟草

梁元任

先生字覺民、鄉籍馬岡。清光緒三十三年丁未、公元一九零七年舉人。授民政部主事、鼎革後歷歷致力教育、春秋八十有七。事略見民國己巳縣志、詩章見南海余少飄編著之廣東歷代詩鈔及碩果社一至三集詩集。

廣雅書院嶺學祠

問字城西載酒行、宗風提唱溯先聲。山川並擷東西秀、門戶何分漢宋名。前度書堂開學海、此間福地占鄉孃。詎無大雅扶輪者、繼起南天隻手擎。

又

溯漢於今代幾更、中間唐宋遞明清。群賢雅合蘭亭數、祠內崇祀先賢四十二人五嶺高懸木鐸聲。縱有歡顏千廣廈、問誰接踵兩京卿。朱九江與陳東塾遊人到此緣何事、休負南皮勸學誠。

伯牙琴臺

流水高山志不侔、知音曠代渺無儔。憑闌指點漢陽樹、隔岸傳聲黃鶴樓。鸚鵡芳洲分兩地、梅花玉笛各千秋。芷灣題壁詩猶在、竹葉書成筆力逾。

采石磯

牛渚山連水畔磯、言尋古跡思依依。謫仙誤認騎鯨事、學士群驚伏虎威。何日臨淮消壁壘、幾人掃石泐珠璣。太真縱擅然犀技、誰與茫茫定是非。

憲子南返賦此贈之

攬轡澄清願尚違、倚閭況復念慈闈。未秋已動鱸魚想、不日能隨燕子歸。蓮社星聯鐘響逸、苔階雪印屐聲稀。此身留作新梁柱、且向長生說息機。

碩果社五十雅集

社名碩果意深微、剝極陽存復有機。數應週迴剛大衍、年躋耄耋尚知非。詩才不讓蘭亭集、酒罰誰甘梓澤依。鬥角勾心娛永日、切蹉可悟佩絃韋。

陸放翁生日雅集

六十年中萬首詩、浣花嗣響復奚疑、杜先陸後同羈蜀、餘事猶爲百世師。

柏園探梅未能如約賦此謝之

此間無地訪梅仙、臘鼓皤皤又一年。擬向平山開倦眼、行看素侶聳吟肩。茲游未獲尋寒鶴、後會還期賞杜鵑。太息故鄉歸未得、徒勞問訊綺窗前。

孟蘭盆會

呼癸呼庚萬萬千、但能食飴便神仙、人憐地下多腸斷、我嘆陽間少目蓮。

抗風軒

南園韻事憶前朝、佳日尋詩酒一瓢。草綠盈階書帶繞、槐黃夾道畫圖描。人同大曆十才子、地似將軍第五橋。最喜三忠祠廟在、千秋俎豆兩廡挑。

對客

客有同心竟肯來、一尊相對趁花開、不談時事惟觴詠、尚贖江郎未盡才。

鶴

長伴閒雲野性存、清高志不在乘軒。江橫赤壁留仙夢、巢傍孤山憶故園。已覺鴛鴦非所羨、還嫌鸚鵡尚能言。八公草木風聲急、喚向人間苦斷魂。

浣花日宴集

物非雨潤不能生、多雨翻思一日晴。月屆清和逢十九、花光四照集群英。

花石主人詩

梁育儂

先生別署花石主人、鄉籍龍潭、性澹泊、時清末民初設帳城鄉授業、課餘肆力丹青、工山水花鳥、同鄉梁伯譽即其入室弟子、有青出於藍之成就、因再傳弟子甚衆。先生能詩、但不多作、僅見於公元一九五六年出版中山古卓崙倡印之現代詩選第一集。

送客

秋山秋水兩迷離、唱到陽關馬亦悲、斷折柳枝腸亦斷、只將雙淚送君歸。

作畫見次頁


山水有清音

梁伯譽


先生鄉籍龍潭、初名伯與、泊與蜀郡張大千遊、相與論畫論文、然後正者。先生別署龍溪老人、又署一峰。生於公元一九零一年、由於天賦、髫齡即已愛讀書畫、在鄉宗伯育儂先生薰陶之下、繼從廣州市國畫會廣交當世書畫名家往來、觀摩相尚、因此乃得與山水大師李瑤屏結筆墨之緣、心領神會攻錯至深、奠定其一生絢爛繽紛之成就。及移硯海隅、設九龍山齋於半島、以課徒鬻畫渡其餘年、作品曾先後於一九五一年至一九七八年凡六度舉行個展於香江、除外還多次參加聯合展覽及在世界各地陳列其作品、以揚國粹。先生畢生之巨製爲一幅長達四十英尺絹本『萬里尋師圖』卷首爲草聖于右任所題者、題跋者復有禹山趙少昂、南海吳天任及同邑耆彥多人、畫中人物數百、樹木盈千、亭臺樓閣、極山川之大觀。先生曾任香港中國美術會第三屆監事會主席、於公元一九七九年病終香港。事略作品見太乙樓所藏近代名家書畫集及中山鄭春霆所編之嶺南近代畫人傳略。

題自寫山水圖見次頁

散策斜陽外、吟詩野水濱、山川春正麗、無那客懷新。



梁育儂先生畫



山川綿邈  
梁伯譽先生繪



難兄畫中詩

梁鼎銘

先生名協桑、鄉籍龍江、公元一八九七年生於南京。早歲游學南洋、習洋畫、後以洋畫雖重實用、但未及國畫之具神韻、令人鑑賞無窮、因兼治國畫、遂為終生事業。民國初年曾一度參與軍政、以筆墨為武器、歷任黃埔軍校革命畫報主編、政工幹部學校美術系主任等職、亦曾創設天馬畫會於上海、以畫馬名動江南、與弟又銘、中銘、並以國畫鳴於時、載藝壇三傑之美譽。抗日戰爭前繪有歷史性巨畫多幅、惜皆受抗日戰爭時毀於兵火。晚年無改其志而終、事略與詩章見南海劉少旅先生刊印之太乙樓藏近代名家畫集。

自題八駿圖

潑墨成霾蔽五洲、毫端點染疑龍虬、胸中欲寫甘霖意、只為人間愛紫騮。

難弟畫中詩

梁又銘

先生鄉籍龍江、生於公元一九零六年、幼隨其兄鼎銘習畫、以擅寫人物享譽中外。抗日戰爭時曾投効空軍、創辦中國空軍雜誌、繪中國空軍抗戰史畫幅、抗戰速寫及正氣歌圖二百幅。其平生作品、先後曾在香港、莫斯科、馬尼拉、美國北伊利洛州、芝加哥等藝術研究會展出、以宣揚中國畫、有墨分五彩之哲理、為美國人士所讚佩、在臺灣時、亦迭獲各有關文藝部門之褒獎。事略與詩章所見、與鼎銘同

自題牧羊圖

客從何處來、坐我林間石、鞭石莫鞭羊、牧民師卜式。

次頁見梁氏昆仲之作



圖 羊 牧  
繪 生 先 銘 又 梁



圖 駿 八  
繪 生 先 銘 鼎 梁

歸夢集

何啟章署





歸夢集

梁隱齋

先生鄉籍水藤、一九四九年南來海隅、先後出長慈恩佛教學校、香港孔聖堂中學、以至於一九八零年在任內去世、壽七十。平生亦儒亦佛、創有金剛三輪明珠諸學會、以弘佛學、復窮究孔孟誠明之道、以章文教。餘事亦爲詩、遺著有隱齋詩集、歸夢集各一卷。

雨聲燈影話菩提小詩代序

青燈照影夜闌時、冉冉孤懷默默思、六十三年生住異、方知與世不相宜。

又

讀遍儒書又佛書、東西聖哲理何殊、從知繼往開來意、無盡新生樂有餘。

甲寅中秋翌早謁母墓

八年廢讀蓼莪篇、歲歲中秋記惘然、昨夜月華人共望、吾家何獨不團圓。

又

題紅碑石色猶鮮、曉露晨霜上塚天、一十八人齊拜首、孫曾兒媳繞臺前。

南薰社初集

共道東坡生日近、羈人海涘同分韻。金燈綺席話瓊華、摘句論詩有良醞。慣聽胡笳動地來、漫嗟楚客呵天問。隨陽哀雁正南飛、吹夢薰風微解慍。

讚佛歌爲佛學班同學朗誦作

釋迦牟尼佛世尊、降生天竺嵐毗園。大雄大勇大慈願、願渡衆生般涅槃。十二因緣四義諦、死生解脫探其源。東來震旦二千載、孔儒老道同一原。三輪法相世佛會、慇懃度我般若門。羅梁劉顏黃高葉、現量比量聖之言。多聞而後能薰習、如理作意成存存。弟子思師未通利、但願無窮薪火傳。

十一屆世界佛教大會曼谷行

曼谷重來又十年、鄭王塔畔湄南邊。落霞影照浪花赤、斜日光迴野草妍。跣足美人歌靡靡、袒肩壯士鼓闐闐。清邁猶記新秋夜、涼露輕車月滿天。

又

銀禧盛會古佛國、菩薩人天集百億。鏤鏢功侷膩色迦、供齋禮數伊蒲塞。嗷呀紛諍印蘭尼、動靜浮沈日意德。漫將樹蔭諭魔軍、四郊許見烽煙息。

又

三千種性共一堂、白黑黃棕各擅場。顯教密宗大小乘、有空禪淨梵巴唐。不關讚佛群魔擾、欲挽迷途浪子狂。二十五年大悲願、莫辭低首拜潘娘。

又

已見星辰非昨夜、花開花謝定無常。百年三萬六千日、一例悲歡離合忙。來拜莊嚴佛像塔、思量菩薩熱心腸。肯教瞻部閻浮客、乞得維摩食鉢香。

校園紅梅盛放十年來僅見喜賦

一樹紅梅放、春光到小園。輕寒聞鵲起、遲旦有鶉奔。北地絃歌輟、南天禮教存。頻宮牆外望、薪樵火猶溫。

戊午年初六隨友雲兄偕國研班諸子遊南丫島留呈君葆詞長

輕舟人去海西頭、煙雨迷濛望九洲。陡倚闌干排次坐、舞雩情味古岡州。春風吹夢盪春波、若有人兮喚渡河。吾黨尚多狂簡在、一灣榕樹繞盤阿。相隨拾翠到南丫、腰腳新來病未瘥。酒食先生都負卻、青蔬黃粟勝魚蝦。扶杖來尋處士莊、六榕齋餅話遍長。詩成我欲先歸去、不待明朝寄草堂。

世佛會十二屆大會日本行夜抵成田機場

島國新秋夜、西風帶雨涼。霓虹燈掩映、高速道康莊。曲播親鄰調、人登選佛場。重來心境異、塵夢兩茫茫。

孔聖堂國研班第三屆始業步文擢兄韻並呈一鶴友雲耀南宜生叔惠諸兄  
術數書千卷、曾無管輅才。文章寧論價、風氣仗誰開。志潔冰霜雪、歲寒松柏梅。漫嗟秦火劫、心有未燃灰。

住嘉樂薩醫院十八日雜感四首

耳聲眼色皆朦朧、苦集難期滅道功。太息此生磨折甚、未應七十便龍鍾。  
神昏氣躓疾幽憂、尚抱丹心到白頭。莫斷現行煩惱障、要從意識思維修。  
衆生疾愈維摩癒、起我摩訶無緣慈。固紙驢年輕易破、行深般若蜜多時。  
金池寶樹彌陀土、富貴風華亦道場。如是空花如是鏡、文雞如是舞當行。

早起八首

曙色晨光破曉侵、宵來回夢費追尋。窗前草綠迎人笑、中有無窮天地心。  
詩心恰與道心通、蛺蝶莊周夢裏同。空識無邊無有處、華嚴樓閣現重重。  
閻浮提住萬億年、滅生生滅境推遷。觀河心目隨流水、展轉迴環不偶然。  
踏向長橋煙霧去、人生驛路何迷茫。涅槃多少燃燈佛、肯借毫光照下方。  
不有人間若阇多、如來未許到婆娑。哀哀底粟泥犁道、大事因緣又若何。  
我與衆生皆有疾、久如丈室問維摩。縱教乞得香嚴飯、可奈喉焦舌燄何。  
大千歷劫風輪壞、補特加羅色蘊無。剩得賴耶餘異熟、依然流轉在三途。  
百年苦樂惱凡夫、渾沌寧知苦樂殊。印結金剛三昧火、依他遍訓滅須臾。

梁氏詩草

梁頌豪

先生之事略鄉籍待考、與伍莊先生稔交、乃早入社碩果、海隅酬唱、詩章見該社第一集及第二集。

落花

花落花開自主張、不因飄泊怨東皇。舞過檻外漫天亂、辭卻枝頭到地香。爛熳園林鋪錦繡、繽紛水面續文章。莫嫌九十春光老、燕舞鶯歌日正長。

倉頡造字臺

字祖堪稽攷、高臺跡未湮。經天兼緯地、泣鬼亦驚神。點畫成偏易、之無認最真。人生憂患始、翰墨感酸辛。

送憲子應徵航空入都

東山望重想襟期、束帛干旌詎可辭。排難魯連稱義士、救時陸贄是良醫。百年大計除民瘼、一片真心奠國基。虛左自應據偉略、翱翔雲表趁朝曦。

柏園探梅

寒風料峭騁游蹤、松竹蕭森路幾重。訪戴儼如深夜雪、識荆猶記去年冬。入林把臂聯裙屐、顧影傾心薄鼎鐘。咫尺柏園成鄧尉、客居香海嘆奇逢。

豆腐

淡泊情懷自食貧、淮南風味本清真。脂膏不潤盤中物、水乳交融席上珍。戀棧劇憐如老馬、素餐休怕誚騷人。燒薪莫當燃箕煮、何忍相煎步後塵。

老馬

昂昂駿足生冀北、不以力稱稱其德。風塵物色遇孫陽、錦鞍繡韉黃金勒。虎頭燕頰班仲升、

萬里馳驅定西域。自從生入玉門關、邊氛淨掃干戈息。歷盡關山三十秋、齒牙增長常悽惻。追風逐電想當年、伏櫪俯首意抑塞。驥子龍孫雖滿前、恨不騰驤周八極。識途究未聘長才、戀棧貽譏自緘默。於今老去亦徒然、願爾白駒應努力。吁嗟乎、於今老去亦徒然、願爾白駒應努力。

花埭紉香園弔南漢李才人并序

南漢李才人若仙、當宋太祖命潘美平東粵時投池殉節、池在珠江南花埭紉香園杜鵑花樹下、今已湮爲平地矣。

宋祖龍興陳橋驛、車馬混一釋兵革。他人鼾睡豈能容、雄藩紛紛獻圖籍。負固不服須用兵、嶺嶠征討早決策。元戎潘美奏膚功、南漢歸命罔敢逆。又見降王走傳車、劉郎北去殊拮据。縱然執挺自稱長、百年宗社委丘墟。辭樓下殿稱臣妾、休論金枝兼玉葉。廷臣無一是男兒、苟且偷生氣先懾。觥觥大節李才人、主辱臣死渾忘身。從容就義池中死、肝膽千秋照蒼雲。道是花埭紉香園、杜鵑樹下即池濱。我來徘徊恣搜覽、荒煙蔓草跡已湮。貞魂萬古總不滅、河山並壽著芳烈。遺跡何庸論有無、春深尚有鵑啼血。蒼茫羊石弔興亡、汨汨珠江水嗚咽。憶昔漢主肆驕侈、沉湎酒色百政弛。昌華苑裏宴紅雲、歌舞湖山夜繼晷。偷安南服妄稱尊、夸毗媚子工希旨。吮民膏血吸民脂、酷虐苛殘難俚指。昏淫黷亂古無儔、朝廷無復有綱紀。才人憂國不勝悲、月下花前淚不止。婉轉陳詞達御前、深宮諷諫欲回天。雖蒙嘉納終弗改、孤負芳心報國丹。可憐宋師下東粵、摧枯拉朽爭登先。君臣相顧皆失色、默然無語若寒蟬。請降納款求存命、有如搖尾犬乞憐。舉朝無人衛社稷、捐生殉國惟釵鈿。才人一死真不朽、遠勝老死牖下爭天年。

簡齋詩草

梁簡能

先生別署簡齋、鄉籍倫敦、公元一九零七年生。精研國學、早年一度亦儒亦賈、經營中西藥物、其後專志於講德授業、歷任聯合、經緯、浸會、嶺南、華僑、德明等書院、桃李滿香江。閒來嘗與南海關少石、潘新安、番禺謝季哲、寶安李鴻烈、台山劉紹進、同邑周宗漢、吟飲於沙田隔田村、號稱隔田七子、公元一九九一年卒於香江。遺著有；楚辭九歌注箋、楚辭天問注箋、漢魏六朝詩論、宋詩研究、簡齋詩草等傳世。

戊辰（一九二八年）二月縣公路既成偕弟葦航侍五叔父九叔父步行至縣府時五叔父初除倫敦鎮鎮長

叔姪能相敘、當門仰好天、朝陽初布澤、寒水尚浮煙。桑蔗基重疊、風沙路蜿蜒。欣知腰腳健、何用歎華顛。

壬申十月二十一日婚後一日隨母氏歸外家觴祖二首

北岸坊前松栢路、慧雲庵右接龍橋。冷風送露花香集、喜氣如春日色嬌。夏屋渠渠連夾巷、肩輿冉冉下重挑。及門扶母相將入、老僕趨蹌遠見招。峻宇高門鐵獸環、此時重闢盡開關。外婆鶴髮今猶健、諸表鵬飛久未還。已報行廚餽饌具、即祠祖位酒漿班。中堂設席吾陪坐、上壽殷勤強作顏。

友耕堂落成歌

乙亥十月十二日、曾祖祠堂初落成。曾祖諱碩字繼苗、號曰省吾堂友耕。祖居同治元年建、住在村北殊崢嶸。各自開家乃遷徙、老屋荒蕪叢飛颺。今因屋基益拓地、重建斯堂凡八楹。三春苦雨更泥濘、九夏揮汗猶工程。發端叔祖朋莊公、主司五叔親執行。十一叔祖霞軒公、復偕諸父成衆擊。我與群弟皆年少、力難任重爲其輕。今看美奐美輪哉、誰知考室艱經營。

且謳吾歌以落之、檢衽九拜揚吾聲。吾聲非善惟唱情。文拙難頌先芬清。祖武悠悠厥孫繩。式相好矣弟與兄。垂諸萬葉資生生。翬飛鳥革東西榮。君子攸躋堂以盈。謹隨禮後歡送迎。衣冠之會一時傾。

十一月十二日鎮中生

祖祠今日恰滿月、夜既嚮明汝初降。吾家支開二十傳、汝維首葉承其宗。高堂望之已數歲、今乃生汝開慈容。喜訊驚傳十叔祖、即令祭廟皆歡悰。晉蕃先生五叔父、賜汝嘉名爲鎮中。嶺南仲冬氣清爽、天宇雲淨揚高風。皇天與人無私福、惟以一善程其功。我祖所居爲善堂、堂號先得吾深衷。吾今以此相期汝、持此長成行厥躬。易道乾乾夕惕若、還期積健斯爲雄。

丙子七月十九日十叔祖朋莊公病終港寓靈櫬運歸故鄉安葬賦此寫哀

余家之至尊、祖業之柱石。闔闈之長材。後生所請益。去歲建家廟、今朝附宗祏。窮海忽騎箕、靈櫬付鄉舶。渡頭設臨祭、哭聲振林陌。歸葬大良城、庶幾安吉宅。炎風莫驅暑、殘陽竟如炙。熱淚濕衰絰、鹽汗霑背脊。回首顧諸孤、幼者長三尺。茫茫已識悲、呼父撫棺索。流水共嗚咽、暮雲只狼藉。路人相歎嗟、憑弔忽如積。至親夫如何、余哀結難釋。

戊寅（一九三八年）臘月既望攜家香港定居並序

先妣黃太安人於去年丁丑七月七日棄養時方日寇進侵我國全民展開抗戰時期今年始秋母喪小祥後五叔謂余可以攜家避地海隅卜居云余聞命徘徊遷延至是乃告成行賦此志之北風吹樹不能靜、倚枕看燈何忍聽。行矣誰憐失母人、哀哉自覺泯天性。三眠三起竟何爲、欲去欲留初已定。母喪小祥逾五月、便爾辭家甚逃命。奈彼妖氛日日深、使余敵愾重重凝。叔父令我攜家去、明朝便趁廣州乘。感我重闈兩祖母、遠離何以致微敬。姮娥有若知余苦、故以清暉慰憂病。海隅擾擾非吾鄉、於此卜居豈云勝。實逼處此無如何、聊當桃源避秦政。

東方曙色方啓明、漸見扶桑掛紅鏡。拜辭祖位行出門、徘徊三顧淚交迸。

喜五叔父攜燮弟來港日值立春

海澨爲家已二年、鄉園回夢總如煙。忽看叔父來當戶、且引陽春共一船。有弟相攜今玉立、披心早識比金堅。從知縣邑經淪陷、行見倭奴溺九淵。

偕葦航長燮侍叔父晉藩澤芸族兄頌豪同遊宋王臺侯王廟兼寄九叔父故鄉

興亡今古恨、此地獨容人。遺廟丹青落、虛臺草木新。雖非前日月、猶是舊君臣。叔姪能來集、鄉園有至親。

辛巳冬香港亂定（爲日軍佔領）有懷九龍諸父諸弟

一九四一年、十二月八日、倭奴攻香港、事起何其欸、先據九龍山、結壘斯屹峯。隔海遙相攻、連珠發砲疾。飛機頭頂過、落彈如雨密、中藏卅萬人、乃似禪中蝨。死傷不可計、淒慘寧忍述。萬古無此戰、孤島其敗必。支持十七天、終見降旛出。廿四日淪陷、戰爭雖云畢。港九未通航、消息何由悉。有懷諸父弟、亦可平安不。臨風欲寄言、鴻雁高飛逸。

壬午初春偕趙少昂偷渡澳門舟次冷汀洋感懷有作

冷汀洋上水聲悲、似向穹蒼訴亂離。多難山川容我渡、此時生死定誰知。魯陽戈在應揮日、文相詩遙已歎時。異代飄流同一慨、東風狂暴晚猶吹。

十二月二十日澳門始發偷渡歸國舟行二日次獨崖夜泊

冷月寒雲天四垂、窮年遙夜客何之。小船藏匿依蘆荻、狂寇馮陵似虎貔。遠火欣知都斛在、橫流今倚獨崖支。妖氛結習崖門近、且待平明間水涯。

都斛訪警察所長黎廷榮心齋

古澳憶前塵、三台此要津。殊方逢故友、警長是詩人。執事兼刑政、危時仗苦辛。殘年餘幾



日、迢遞待來春。

台山縣訪縣長陳子和其間幕府多詩人有同邑黎騷暢九南海吳天任荔莊等

聞名今始見、入國教堪知。言自鄉音舊、詩傳幕府奇。表文初集畫、倡儉足匡時。豈似河陽令、風流亦可嗤。

從肇慶步行至廣利

踢破雲根腰腳輕、青春作伴重行行。羚羊峽外波濤急、墨硯洲前草木清。嵐影墮江深淺碧、舊遊如夢古今情。重來不似當年意、況復危時事遠征。

曲江歸後古澳重來知李研山馮康侯同在廣州灣即往尋之

韶州歸後又雷州、五嶺南灣得地優。莽莽風雲常變幻、栖栖道路欲何求。素心人往趨同道、劫外天存許自由。但與二君晨夕共、寸金橋去是何秋。

廣州

廣州混混豈堪言、死市家家自閉門。九叔一肩支舊業、百年多體結深根。古來浩劫無今日、運去中衰繫亂源。異族豈容躋定主、黃花岡上有貞魂。

甲申三月十四日中山小欖偷渡至新會河塘

分攜江畔入孤篷、樹底潛藏俟便風。十五人中共生死、二三里外各西東。濁涇清渭流應異、屏息蟠身氣獨雄。舟子揚言過禁境、一時噓吸覺夷沖。

祁陽端午

三宿岫嶺下、今日到祁陽。正當端午節、乃得遊三湘。一心懷湘纍、四顧感淒涼。府頌疏散令、明早須下鄉。哀我羈旅人、前路惟茫茫。涿水聲嗚咽、行人色倉皇。佇看白日暮、無語倚行裝。

貴陽深秋

在昔鬼方地、而今要路津。黔靈堪犯漢、赤水不通秦。野草黃於菊、江楓紅占春。忽然逢峒獠、上國永爲賓。

重慶

征途八月飽風霜、得到陪都感更長。冠蓋於今疑盛世、鼓旗惟覺異前方。曾停老杜西南棹、喜近三蘇父子鄉。得向眉山瞻故宅、錦江還拜浣花堂。

僑務委員會呈委員長陳老樹人

昔讀丹青心已儀、今能親接且聞詩。曲江風度瞻容止、驚坐文辭更瞻爲。辛苦歸人方痛定、亂離僑務仰明司。他年平寇還州郡、珠海雲山杖履隨。

乙酉（一九三五年）七月十五日張子春翟覺群王淑陶三校長邀同何曼叔唐穎坡余少驪陳

湛銓陳逸夫陳舜卿馮憲彬寶璧伉儷及余同組嘉陵詩會初集於復興閣下中印學會以泥上偶然留指爪鴻飛那復計東西爲韻拈得東字

陪都七月似燼烘、望盡長暉只作虹。夏老餘威猶虐世、韻高抗古發南風。豈同逸少蘭亭會、卻續天如復社雄。且看今朝名士氣、堂堂應不讓婁東。

渝州對月

萬劫猶生命在天、倦扶孤影度山川。黃昏飯飽家鄉味、秋水茶烹穀雨前。有夢作歸殊草草、託詩於怨自年年。只嫌對我渝州月、又向倭奴甲帳圓。

八月十八日嘉陵詩會第四次雅集

社集纔三會、倭奴盡喪師。高歌驅鬼魅、我士似熊羆。此際雖乘興、明朝又惜離。無心謀雅韻、相見問歸期。

丙戌春自渝州飛上海狂風暴雨逼降南京

鐵翼難飛降國都、疾風甚雨揜天衢。方辭西蜀蠶叢地、來訪南朝裙屐區。采石雲深春減卻、秦淮燈暗水何汙。昔從詩語神先往、今得親遊竟絕殊。

春申道上

一宿平明又去休、匆匆負卻六朝遊。尚含沈雨淹初日、爭出群山赴亂流。國文宮前新俎豆、春申江上舊扁舟。有人寂寞清塵隔、坐老京華閑白頭。

還鄉道中圍沖舟涸

圍沖水淺不盈尺、墟里前頭尚滯淫。兩岸風光猶往日、一船人語盡鄉音。原知再去誠何意、求得同歸此放心。檢點生涯報親友、篋中詩卷勝黃金。

十二月二十二日自鄉來港示葦航

重光一載始重來、歲晚行人失故哀。闐闐熙攘多笑語、室家表密少空臺。故都義勝群何怨、異地仁歸理豈該。爲共榮枯翻愛繫、山陂樹石輒徘徊。

星洲客夜與少棠二兄耀平七兄各述別後離亂之情感成一律時癸己暮春

暮春三月忽南行、把手殊方似隔生。長夜各言離亂際、當時直與死生爭。於今故國休相問、縱近家鄉缺寄聲。別後侵尋無一是。但耽詩卷弗關名。

和韻歐陽徹微見贈之作

風雅載衰變、斯人獨古音。有詩驚海外、借酒盪胸襟。芳草終分艾、高山亦有岑。前峰應可接、相與勵茲心。

和韻陳丈蘭生見贈之作兼呈歐陽雪峰丈

一見情逾夙所親、賜詩辱簡意彌真。客中孤抱空成詠、海外鄉音至足珍。何必平生感知己、

卻從文字契精神。炎風且遣爲先導、行向儒林禮丈人。

乙未清明輓黃偉伯丈

四座詩成進酒時、忽辭吟侶自騎箕。剛纔笑語成千古、共此殘筵最後期。當戶花枝猶淚濕、滿天風雨助心悲。誰知七字清明柳、正是先生絕筆詞。

六十生朝

萬里西風到鬢邊、秋英霜傑若爲妍。鏡中卻見新顏色、夢裏難尋舊地天。過眼浮雲看不盡、照心靈火欲重然。獨慚伯玉能隨化、又過知非更十年。

辛亥晚冬偕湛銓校長及鴻烈國亨嘉強柏勵翹初乃文同佳君甫潤華諸子茶座小集

陸壺盧盃釀輕雲、蕩滌詩腸氣並芬。斟酌辭源三峽水、辯雕物始二京文。殘年兀兀人終老、吾黨翩翩各建軍。窗外森風噫奇響、爲催驚座報高聞。

迎陳荆鴻自美洲歸并送許菊初赴美潘新安赴加

送將往燕迓來鴻、先後憑虛各御風。奇響年年驚帝座、文星爛爛耀蒼穹。好聯鄉里結遊侶、并受兒孫拜阿翁。共向彼邦張異采、俾知窮海有詩雄。

丙辰春禊錦山文社雅集

又是重三節、錦山修禊時。年年爲此會、往往不成詩。碧樹紅芳合、低檐巨嶂支。墨池春正好、神筆盡雄奇。

海隅近事示嶺南諸學子

隔海群山拱校門、近青遠翠映芳墩。出藍有兆期諸子、觀水分流溯本源。國故斯文須自重、方言非類任渠喧。當前正是康莊道、闊步昂頭好駿奔。

秋日聽曉山房雅集呈主人梁鏗齋耀明

嘉招屢負到於今、待散炎蒸始遠尋。一路沙汀留履跡、半林夕照煖秋心。海涯浪起欲橫潰、天末雲生垂翳陰。酒罷歌殘歸犯夜、明朝風雨重登臨。

己未年初二夜從電視觀廣州感賦

三十年前別廣州、一來窮海遂淹留。每勞短夢家難至、豈爲重雲道更幽。舊國風光空想象。今宵電視引神遊。江山尚喜能無恙、涕淚如何不自休。

還鄉吟辛酉六月廿一日過澳門趨拱北內姪何乃桐備車迎還住其家十日作詩五篇

澳門舊遊地。卅年不一至。今日再經過、道途皆忘記。故人多不在、一宿亦無意。驅車出關、近鄉更翹企。行行重行行、輕齋成重累。始覺筋力衰、老來欲何冀。

到家

斜陽舊門巷、己過自不覺。衡宇雖髣髴、庭戶已非昨。入門見表妹、住客殊不惡。相將過祖居、景象更蕭索。門前障竹籬、後堂興斧斫。蘊淚不敢流、倒向五中落。望空三揖拜、祖位久高閣。兩屋不我容、歸身欲何託。

尋父母墓

戊子三秋暮、父母骨始祔。地在舊寨陽、不封亦不樹。只以時匆促、非敢依古務。意待來年春、短碑以題墓。豈知隨解放、來去艱行路。一阻卅三年、重來了不悟。徘徊幾徘徊、疑似復疑誤。當年太疏忽、吾罪不容恕。雲山四茫茫、行行心愈怖。此心誰得知、一步三回顧。此心誰得知、一步三回顧。

廣州

白雲被海蠻、引此羈客還。一車渡珠江、江水何潺潺。卅年多少夢、夢裏常游攀。白頭始來歸、未及登雲山。山川固無恙、老我凋朱顏。市容亦憔悴、豈復歷險艱。掉臂自行遊、炎烝

汗潸潸。得見諸弟妹、亦足慰間關。

晤別剛齋並示諸弟妹

蘊淚不敢流、恐傷歡鼓情。各訴當年事、相看如隔生。一別卅三年、一鼓即宵征。深樽歡淺酌、杯盡還復傾。夜短語何長、星月已縱橫。且待木棉紅、春風催我行。再會只斯須、莫愴別離聲。

日本謬改侵華史實賦此書忿歲壬戌

倭奴侵我豈惟聞、請看南京古寺墳。四十年前己身受、八千里內盡妖氛。刺天無刃猶揮日、拔地生風欲起雲。史實於今圖妄改、重鉤舊恨氣如焚。

端正遺風

梁端卿

生生鄉籍馬岡、爲清末宿儒述亭公之少子、光緒丁未舉人元任先生之弟。幼承父兄之訓、涉獵經史、畢業香港漢文師範學校、即努力於當地華人教育工作、創立端正中學、垂二十餘年、以終其身、出其門下者數萬人、現皆已服務人群矣。略歷詩作、俱見現代詩選。

壽李樸生社友六十華誕

臨江家世擁旌麾、間氣還鍾典峻扉。九譯僑歸賓館樂、百年計在故園菲、扶摩勁節當疏雨、揚厲天聲接景輝。爭說健行知道大、浩歌先晉古來稀。

臺灣詩壇月刊三周年紀念

海畔遙瞻五鳳樓、風帆歷歷度三秋。南園有集傳千唱、江左如今第一流。出篋頓盈收薊淚、讀書常抱沼吳憂。他時洛下成佳會、應喚新亭是楚囚。

系先君子淑園公



追祭文



杜好孝詩

岑學呂題



拙存堂詩

黎慶恩

先生字澤闈、鄉籍昌教。生於清光緒五年、公云一八七九年、卒於公元一九五九年。宣統元年拔貢、畢業武備學堂、復留學日本習法律學成、歷任廣東省立法科大學校長。公餘喜吟詠、遺著有拙存堂詩上下卷、先生歿五年、其哲嗣心齋爲之輯校刊行傳世。事略見民國己巳版縣志選舉表。

大良曉發

渺潏石湖曉、雨餘潮正生。移蓬驚鷺宿、軋櫓先讀去雞鳴。塔插青雲出、波磨碧鑑明。寒宵鳳城盡、渡旦又羊城。

清明日登馬寧諸山掃墓便返里

少小離鄉井、清明今始歸。年深墳草蔓、春老陌桑肥。健步還腰杖、新暄不汗衣。踏青問花柳、風景未全非。

過白沙鄉謁陳石齋先生祠堂其鄉老以先生遺像及玉圭出示

芳草白沙洲、垂楊碧玉樓。衣冠瞻像肅、圭璧與名留。窮巷新絃誦。祠堂付小學荒臺舊釣遊。世衰多曲學、誰爲續前修。

三月二十九日偕警校諸生雨中登白雲山

山徑半日雨、泉勢猛於潮。峰盡塵容滌、林餘病態消。老夫猶逸興、諸子各清標。十里菖浦澗、尋春未覺遙。

春雨懷葛民南京

窗竹晝如暝、園花風欲殘。雲陰催夜早、雨久釀春寒。殲敵聞方喜、思君夢未安。祇愁京國逼、氛侵尚漫漫。時壬申春日本兵寇犯上海



由香港回廣州夜經諸佛嶺地屬寶安有警  
警傳諸佛嶺、幸託佛幃幃。途半車停後、山重火滅中。投林翻礙月、聞籟更驚風。此地多靈  
驚、群梟莫自雄。

澳門旅次時歲己卯（公元一九三九年）日陷廣州避地於此  
歷盡流離苦、移居到澳門、敵氛群島逼、海氣九洲昏、關小華夷限、關關爲澳門與中山縣交界處市榮商賈  
尊。可憐籬下寄、闖闖誤桃源。

與張純初高劍父晚登東西望洋

不必望洋嘆、東西一覽收。夕帆隨日沒、煙嶼與天浮。故國猶多難、殘身敢小休。登臨無限  
感、聊爲覓詩留。

月夜聽松山館陳叔舉彈琴即贈館主人何斗燦醫生

敢自詡知音、來聽月下琴。懦絃沾露重、幽響裊雲深。莎蟀悽如答、松虬怯不吟。高蹤壺隱  
地、萬籟契秋心。

辛巳（一九四一年）留別旅澳門諸友

濠江苦留滯、今始曲江行。聚散誰無感、親疏各有情。別猶湖月惜、去及嶺雲迎。涉險憑忠  
信、望洋君莫驚。

曲江病起戲作

吾衰未憔悴、無補奈才何。譴匪昌黎譴、負惟彭澤疴。瘡痍猶衆庶、命脈在山河。不信魔成  
病、耽詩或是魔。

六十自述

人間花甲喜諛詞、自壽吾偏黯自悲。居尚未安遑及樂、貧難爲禮況非時。諒無貴骨榮衰耄、

賸有殘身飽亂離、四十五年前一顧、國門兩見擾蝦夷。

甲午之役余年方十五  
距今四十五年矣

前題之二

歲月蹉跎兩鬢星、壯心原不讓年青。憂時早自研兵略、問世尤常抱律經。腹笥映分鬢序舍、舌鋒小試法曹庭。匹夫況有興亡責、四海烽煙正未寧。

曲江得陳樹人自重慶來詩有懷卻寄

客蜀詞人例富詩、君詩亦得蜀山奇。頻年宦隱無塵境、及老騷吟有綺思。巴雨定添清話暢、巫雲常恨報書遲。臨風欲寄難爲語、不盡秋心箇裏知。

過南華寺贈岑伯渠學呂

久別重逢各問年、風姿曾不減從前。入山早作孤蹤隱、訪寺還留一話緣。同學漸稀逾戀舊、虛懷相對已通禪。近嫌詩味清如洗、願報曹溪半勺泉。

聞日敵降服喜賦

八年鋒鏑幾瘡痍、聞敵崩摧喜可知。報捷官書馳露布、受降帥艦簇雲旗。門成困獸馴終盡、迎到牽羊悔已遲。從古敗亡由黷武、廢興仁暴此分歧。

初歸喜遇舊同學莫子亭陳協之曾伯陶諸君廣州聚豐園小酌

戰罷歸來固是窮、可堪門巷過常空。無多親舊重逢後、已往艱難一夢中。赤手生還仍故我、白頭同學盡衰翁。小園偶聚深談處、酒薄茶粗亦覺豐。

自題小畫像

七七經過歲月徂、故吾無恙到今吾。鬢絲未禿奚言老、腹笥猶便讀平漫笑癯。樽散祇堪隨遞、雙、菜香原自稱酸儒。儘多文史閒中樂、吟唱聊爲晚境娛。

八十生朝無聊自遣

八十生朝寂寞過、兒孫侍少遠離多。麴牲當肉鮮慳供、蔬食無魚味懶和。顏只一簞饒樂趣、  
瘦雖三韭費搜羅。年來病後經辭酒、飲但茶清敢醉酞。

### 悼亡歿於辛酉之春

形影相依廿四年、一朝鏡破竟難圓。多情豈亦遭天妒、中道胡因便棄捐。  
風雨雞鳴總恨天、桃花人面憶潘前、輪迴神話如堪信、願結來生未了緣。

### 村居雜詠

豆花棚下山橋頭、一水寬如丈八溝、可愛日斜潮未落、看兒新泳學蛙浮。  
廟門依水樹交陰、晝永無人每獨尋、坐久不知榕子落、尚疑魚沫暈波心。

### 丙辰旅京冬至日大雪鄒海濱許佩芷約遊農林場主人唐子珊留飲幽風堂

久客冬催歲、漫天雪撲人。萬家群息動、孤館寡交親。興發來諸子、尋幽快此辰。南沿京市  
路、西出帝城闔。四野青山隱、千村白屋貧。風嚴尖似刺、冰凝淨無塵。越陌方迷轍、趨林  
且駐輪。門臨思訪戴、堂入恍居翕。雜坐圍鑪煖、歡談佐酒醇。園官欣送菜、內史合羹尊。  
閱辯聆鄒衍、清懷愛許詢。日長剛令節、星聚盡嘉賓。微醉開軒望、徐行繞徑巡。撥苔深沒  
履、倚竹濕沾巾。園趣亭皆翼、池光水不鱗。樹明林表霽、花煖室中春。樓憶輿迎鳳、墳餘  
石臥麟。烈中有女塹暢觀容俯仰、歷劫感新陳。泥印空留爪、雲蹤莫駐身。瘦兼梅骨格、寒共柏  
精神。玉宇居非易、金臺聘孰珍。斯遊能幾度、驢背話前因。

### 舍弟葛民悼亡詩以慰之

我家四昆弟、中歲三悼亡。門祚念衰薄、欲語心先傷。我婦昔在時、賢亦慕孟光。十八歸我  
家、貧賤甘糟糠。乳下撫童稚、膝前拜姑嫜。言笑妯娌間、藹藹春滿堂。白頭誓相守、將終  
老媚鄉。豈意中道捐、一朝委榛荒。魂兮渺何處、白水村邊塘。亡婦葬河前泉塘鄉前悲尚未弭、後顧

更不違。而汝乃同病、風雨悲空床、遣此誰所能、兒女多情長。我本過來人、爲汝陳衷腸。古來曠達者、鼓盆歌有莊。歌豈遂忘痛、痛極歌始狂。人生非金石、安有不死方。汝婦況病肺、柴立瘦欲殤。以茲蒲柳質、胡能耐冰霜。嗟哉百年夢、齊物何壽殤。死者亦已矣、無以憂自戕。天地固無情、收汝涕泗滂。汝有好畫筆、莫畫眉樣妝。紅妝已黃土、那處求稠桑。有夢轉煩惱、有魂仍渺茫。曷不寧汝神、愁時進一觴。努力加餐飯、長保汝健康。上有慈愛親、無令缺酒漿。下有零丁兒、無令單衣裳。來日正大難、事畜職所當。且留不盡情、落花惜餘香。鴛鴦本並命、大小必雙翔。疾風碎綺翼、雲間遂分張。不平物且然、失意人之常。中年憂患多、悲來況未央。造化同一理、空色兩相忘。我詩以慰汝、情至無文章。

逸齋詩稿

黎葛民

先生字逸齋、鄉籍昌教、生於公云一八九四年、乃黎慶恩之季弟。少年留學日本、與番禺高劍父、番禺陳樹人相切磋、乃擅繪事。因嘗與其兄及高陳二人等組清遊會於廣州、以廣結名士、復周覽名山大川、將見聞者歸於筆底、因間亦爲詩。抗日戰爭前曾從政南京、從教高劍父所辦之南中畫院及廣州市立藝專、公元一九七七年歿於廣州。事略見中山鄭春霖編之嶺南近代畫人傳略、詩章見南海余少飄編之廣東歷代詩鈔卷十一所載二首。

西風

西風簾卷夜初長、嶺外秋深露不霜。月自清高懸碧落。人方罷斃警紅羊。十年牖下書徒讀、一覺花陰夢亦香。風雨滿城菊正蓄、不成佳節負重陽。

失題


幾間白屋倚山村、松竹交陰綠到門。作戲兒童騎竹馬、備冬家戶足雞豚。平湖水落沙逾闊、密樹光穿影自圓。治亂不聞秦與漢、更於何處覓桃源。



△1948年，陈树人与岭南画派同人组成“今社”，以发扬中国画为旨趣，并在广州举行了画展，成为一时盛事。图为岭南画派同人的合影，右起赵少昂、关山月、黎葛民、高剑父、陈树人、杨善琛。

山水

黎葛民笔



順德黎暢九撰

嵩庵詩稿

五樂樓叢書第廿九

蒿菴詩稿

黎暢九

先生名騷、別署蒿菴、鄉籍龍山、生於公元一九零四年。父豫章字寶書、清宣統元年歲己酉拔貢、曾任江西知縣、見民國己巳版縣志。暢九幼承庭訓、歷任上海廣州各報章編輯、屢充粵省屬縣僚幕、抗日戰爭時、曾避兵桂林鮑經憂患、其間一度流寓港澳兩地、晚年體弱多病、公元一九六九年歿於鄉。先生平生詩稿得友人南海區季謀爲之手輯、南海吳天任同邑蘇文擢各爲之序、公元一九八七年南海何耀光刊爲至樂樓叢書第二十九。

園坐時歲次己卯

滄江如歲去堂堂、寂寞遲來味轉長。闌外竟成心語地、花間猶是日爭黃。茸茸細草緣陰長、脈脈寒泉闕地藏。園地下俯仰漸疑齊物意、鼻端明後起微香。

答柳亞子

難得居夷此夕親、接杯先感季鷹莼。主人張季鷹以莼羹鮑客回燈豈獨詩情躍、握腕同爲國步呻。滿眼怕看籬下菊、何時還作嶺南人。如公期艾文章腹、上下縱橫論有神。

澳門松山步月同黎心齋張谷雛次谷雛韻時歲次庚辰

月閉重雲海尚明、山分餘色夜逾清。破街狂犬驚群影、深木寒蛩咽斷情。彼物因時猶作態、於人何事轉噤聲。心心相印真成鵬、恍忽松濤天際行。

題蘊廬詩草

寶玉吾鄉信可知、君家獨漉便堪奇。十年舊抱元龍氣、一卷新成子美詩。脫盡繁華歸淡泊、寄將風月寫流離。相逢我有潛夫論、猶記聯床共語時。

辛巳三月自香港歸粵間道羊城而至蘆苞

倥偬半日駒過隙、一舸風光別五羊。春去葉分新舊綠、雨餘江長淺深黃。牛方嚙草猶牽鼻、

鳥未啼紅先斷腸。歷歷經行生死地、幾疑曾作活無常。

六月十六日發蘆苞赴端州途中

東風破暑眼猶寒、萬籟衝埃意自寬。臨水樹高寧障雨、出山雲好欲成巒。渾黃勢暴江添潦、袒白群誼船上灘。來日星巖遙望處、石頭路滑未爲難。

壬午北行曉發

竟夜風吹雨、扁舟鱗語篙。微青搖獨樹、碎白出輕濤。倍發裁詩興、未云行役勞。歸帆來日路、下瀨意猶豪。

癸未十月十二日自蒼梧發舟至桂林同李鐵夫易與民學子黎銘

六載重爲八桂行、故從改道味前程。礁光密印圍棋局、山勢岑如折腳鐘。船逆灘來添浩瀚、月移樹入寫縱橫。蓬窗蠖屈觀千變、留得重煙筆底生。

甲申輓菊人文

淚眼頻年哭舊中、廣才子與海綃翁。排牆得免猶爲客、懷土能歸尚見公。文教滅亡隨寇去、老成埋沒逐時空。聞哀未遽吞聲哭、曲水前頭急朔風。

乙酉初秋日敵告降賦此志之

不期厭亂亦由天。大亂纔終四酉年。腥家謂今年原彈脅降驚陣後、童謠報捷在秋先。能完破國緣坭足、便晉強鄰慶比肩。最是閭閻無限意、紛紛羔酒設神筵。

丙戌元月十二日陳文羅生招赴沙貝謁陳秋濤先生祠展讀遺墨同梁培基洗玉清陳穎生

向日雲浮懷別宅、今朝同謁故侯祠。褒忠勝國餘公諡、練要遺文起後思。清乾隆時追諡文忠肯以清談沽抗節、何曾致寇侈攘夷。平西往事猶能憶、三百年來感係之。

丁亥陳樹人罷官南歸譙之太平館值大雷雨



夜雨真成浣戰塵、先生有戰塵集歡然一室能爲春。笑談不向雷聲變、肝腎都迎屋瓦振。讀書論詩心事好、長魚大截酒邊新。衆生不薄江湖味、如此風光筆有神。

戊子清明

稠紅嫩綠莽江城、漠漠輕煙不閉晴。市井鬼錢成屬目、郊原婦墓有哀聲。側身且任牛先路、曲肘聊參茗一棚。檻外木棉續作架、春風猶及與縱橫。

己丑羊城春感

五嶺春歸寂寞中、木棉紅發炫新烽。何當節物開生意、賸有雲雷盪此胸。落落孤誼窄天地、紛紛世事付蛇龍。衆芳孰與哀蕪穢、漸漸平原偃綠茸。

庚寅除夕

生事經年靜裏過、拖泥帶水復如何。相逢笑口渾忘語、便插寒梅未厭疴。堆喜英雄隨俗換、盡情燈火入時多。萬人如海藏吾在、且緩來朝共放歌。

辛卯題朱九江簡岸兩先生遺墨合冊兩首並序

九江先生講學六榕寺簡岸先生著書永福寺往者州中士大夫歲時於六榕寺拜九江先生朝余忝隨末席壬申冬任子貞年丈介謁簡岸先生於永福寺因得奉挹高風任丈爲簡岸先生及門弟子設廣才學院於禺山其下爲陳秋濤先生碩膚堂故址邀余佐講其間凡六寒暑院懸朱簡兩先生像俾諸生瞻仰此冊爲任丈舊物展轉歸余浣讀之餘不勝惘惘

道學何妨懸宋禁、崖門易代拜名儒。拾遺更有微言在、南海他年識巨珠。

六榕永福寺相望、拜像觀容兩未忘。薪火即今何處去、講堂空憶碩膚堂。

壬辰題黃晦聞與任子貞論簡岸先生立傳書

道在斯人與、借蒹葭樓詩句何須付衆咻。九江尋墜緒、一札見源流。

癸巳上巳兩集粵雅同鄭彼岸黃幼圃張友仁侯子約陳羅生羅軼群潘叔磯黃文寬  
去年重九此園中、禊事今朝轉眼同。尚遠急流憑雨祓、卻從平地怯山崇。庭垂桐乳寒猶勒、  
閣近蓮鬚夢或通。猶及老成談袞袞、我懷如坐永和風。

甲午元日剛齋以朱梅見貺虬枝盈丈丹砂萬點蔚爲巨觀賦句酬之

萬蕾枝頭鼓欲催、心如天地不須猜。自持清骨何妨醉、共葆朱顏有待開。衆卉正憐陳市賤、  
好花恰爲紀年來。多君寄與江南意、留向春回一剪裁。

乙未生朝

孤虛未信楊公說、耳目真成面有憑。廚下阿娘供筍豆、坐中生客對峻嶒。何曾稚子忘吾降、  
太息良朋變盜憎。瓜蔓明知抄可及、委懷無改付蒼騰。

丙申三月十六日六榕寺祝張喬生日

榕影鶯聲又及辰、焚椒酌酒詎無因。良朋總爲蒼生死、麗什都成白社珍。青草已迷埋玉地、  
紅粧猶記惜花人。廿年往事吾能記、拓得殘碑墨未陳。

丁酉於夜冷攤檔購得先賢梁燿樞名字印章一雙因成絕句鐫之石旁

市兒都愛狀元名、紙尾朱殷倍眼明。身後榮枯誰得管、冷攤相遇若爲情。

戊戌十月庭前杜鵑一株陡然盛開花光滿室顧而樂之此乃前年退菴所貽爲賦句簡之

三月花移十月中、燁然一室忘冬隆。自能出色朱猶奪、解語懷歸鳥亦同。老幹鬱蟠如對爾、  
好花怒放各成翁。閒閒二十年間事、倘憶茶薇論酒功。

己亥題黎二樵先生畫象

踵武三家粵海隅、百花村裏老樵夫。不遺鱗爪歸湖海、慧眼王郎早不安。  
王蘭泉編湖海詩傳始編載二樵終補之

辛丑修先墓

憶昔蝦夷肆虐香江濱、避寇乃爲蘆中人、板輿顏色數月間、飛車日下野趣新。誰知一病棄兒去、號旻陟屺莫贖身。拭淚蘆洲寄桐棺、寒食年年入夢頻。寇退負骨歸來兮、合窆敬與諸母齊。鐫碑兀兀記所葬、隴阡待表草萋萋。咫尺龍山失重九、清明一奠聽鶉啼。自從天翻地覆動埏陔、無復紙錢白飯祭掃回。鄉人來道廬爲地、萬山蒙茸非夜臺。去年抱病得小休、亟歸掃墓向山隈。豈知望眼皆薯蔗、因風搖曳迎客來。青葱高下無盡處、墳塋已沒碑失栽。深谷爲陵陵爲田、仰天四顧空徘徊。危牆稍認洪聖廟。遙際飛飄蛛蝶灰。逮存日短祭亦荒、孤塚復夷心百摧。此生非生徒身在、禍及慈親萬死該。經年惆悵眼已枯、認穴奉骨愿糜軀。先靈慰我如有示、得逢當年事葬夫。葬夫即將死者躡躑相見問所悲、指點墳地向蔗區。且言海外歸人尋墓多、里胥鄉中役職者稍許存舊圖。聞之恍如雷霹靂、開劈心竅亦何殊。葬夫願爲尋碣且復墓、索取何敢計錙銖。扒剔蔗土認故穴、重植墳碑芟莽蕪。旬日鄉居問舊識、百死一生兒不符。對我支吾但搖首、無語指腹立須斯。不知于意乃云何、只我心靈太不愉。

壬寅十月八日遊觀音閣樹盡樓毀獨崖角老榕半枯同行者或沃以水余廣其意爲賦一詩  
環村萬木已爲薪、無復亭亭蓋路人。厓角得危榕未絕、天心不赦我猶珍。何曾一勺蘇窮壤、但冀千門作好春。眼底夕陽啣半月、芸黃滿地向誰親。

癸卯得三女自農場來書示之

汝母開函念汝餘、半年一別憶春初。插秧尚得頻挑水、咬菜還思更讀書。不忍拊頭似類我、但期振手勿爲儒。肚皮縱向時宜飽、恐入胡元九等居。

甲辰述懷

居既無聊行不得、青青猶是未枯燈。倘捫瘦骨疑爲醉、曾讀陳書倍自憎。微詠偶成心語韻、孤懷何似俗居僧。流光六十熙熙過、便到期頤付暮騰。

乙巳元日

一市花光換歲姿、佳人索寫吉羊詞。題門朱楮誼符語、影壁紅桃舞墨枝。漢臘廢餘蛇尚赴、春風歸待燕同遲。胸懷淡宕難遺世、敢說天爲是我詩。

余所居里有雲吞叟夜夜擊竹叫賣見之將二十年矣時移世易久不聞此而叟亦不見七八年近遇之道旁自言年逾八十業雲吞販五十餘年近乃無業病窮且瀕於死聞之慨然  
宵深擊竹告雲吞、五十餘年縲面人、幾度星霜纔不見、天教翻得病窮身。

又

無食無衣無定居、自言擇業悔當初、早知負販徒勞力、只學神仙辟穀書。

丙午季子（區季謀）自海島歸元日同遊花市

海島屠蘇倘不殊、故鄉難得與君俱。如龍但見人流急、走馬同尋花市娛。衆卉紛陳煩潤飾、高枝何處覓根株。天荒看破渾忘語、祇待新詞聽貫珠。

季子詞人善於用俗不遜誠齋因試爲之曰郊村廬體也成廣場一章

廣場嘈入鼓聲中、信口開河不改容。百戲耍來空鬼馬、一圈圍住算人龍。打羅伙記還拋網、混世生涯只種松。雷劈等閒猶有藥、華佗總是自家封。

丁未內子宛湄生日紀之以詩

銀婚應是念慈時、余母因病促結婚今二十五矣劫換紅羊懺早知。不爲兼挑那得汝、相從一歲且稱師。宛湄從書也頻年居厄猶歡忍、群盜當前更護持。丙午秋有盜入室午日繞過逢設帳、好投同好紀之詩。

村居

六三翁自執鎌磨、筋力其如瓦石何。毀室連鄰烏曷止、壞垣當午鼠頻過。欲圖收拾先除草、免使蜚蛙再放歌。猶恐養花嘗享樂、老妻勸種果蔬多。



心齋詩詞

黎心齋

先生字廷榮、鄉籍昌教、生於公元一九零一年、乃澤闈公哲嗣、畢業廣州中山大學前身之廣東省立法科大學、曾執業律師、有聲於時、餘事亦工詩詞。因得兩代明察秋毫、一門挖揚風雅之譽。抗日戰爭時流寓濠江、其後杖履香江、以飲酒賦詩樂其餘年、卒於公元一九八八年、壽享遐齡。先生平生間亦作畫、是純文人之筆、書法則獨擅狂草、爲世所珍、遺著有心齋詩詞。黎心齋草書聯稿。

錦瑟作於丁丑

錦瑟涵幽閣、吾從商隱商。黛痕搜鏡匣、秋夢貯詩囊。紅葉蕭疏處、青山淺淡妝。去雲情自薄、空爲想衣裳。

戊寅避兵澳門西灣晚坐

既友西灣石、還從潮汐游。晚霞盤岸迴、人意及天浮。花引隨緣目、江涵入定舟。相哀曾未已、敢用歎橫流。

己卯三春南灣次和佟少弼

落日平湖浩浩心、古流不廢共言尋。投閒筋骨終爲倦、失意江山屬望深。老樹當風無脆葉、絳梢如錦付微禽。物情忽悟三春暮、回首芳菲可得禁。

庚辰哭廷獻四弟歿於曲江

行斷曲江城、千山復阻兵。有身儕喪亂、無命接承平。親老支離際、兒拋骨肉輕。弟娶法國婦生一子不克歸一棺掩長恨、生死苦爲情。

讀家君子旅途雜詩想見行役之苦

日日山程復水程、扶攜千里重驚兵。行人繭足曳何處、合眼惟知行處行。

前題之二

去留眼底都爲客、負室長征老尚堪、別得秋山行役法、兩孩分作一肩擔。與孫兒同行

辛巳寄廷宣五弟成都

憶共承平日、扶搖駕北溟。弟爲空軍戰前曾與駕機出海眼從天界落、身任白雲經。百戰酣鷹隼、餘生念脊令。即今勞朔雁、萬里蜀山青。

香港陷日敵喜李研山馮印雪趙少昂張韶石鄭春霆脫險至澳

萬吼排天劫火侵、山樓顫動陸垂沉。奈何上國虛神武、終見降幡變古今。出入死生懸一笑、查牙胸腹贖微吟。也將鰲面延塵面、海角平添幾足音。

除夕

四年不籍身、多愧一塵氓。殘世寒偏酷、故園春未真。瓶花憐小劫、盧雉醉時人。澳門除夕隨街賭博爆竹聲悽緊、疲心怵戰塵。

壬午春霧

微生親萬幻、視止若爲勞。霧色濃於乳、春燈碧有毛。尋常天所棄、人物夢相遭。不覺成孤往、飄然杖履高。

余將離澳區小松設餞酒次出其所臨黃大癡富春山合卷求題

區子作畫參篆理、雲煙脫手呵難止。富春半壁碎河山、從今收拾爲一矣。大癡富春山卷世傳有二小松綴臨其一臨裝展卷意元蕪、千山看己成畏途。明朝設想谿山裏、著箇征人便是吾。

澳門曉發

勞勞破殘夜、曉色重吾行。長路開千里、扁舟先一程。歸心天地闊、換世死生輕。回首西灣樹、離離胸次橫。

癸未端午舟次端州遇空襲

勞人惟奔波、胸次亡曆日。里巷逢艾人、語以端午節。薄醉酬靈均、殉名笑痴絕。落日明扁舟、舟背都城發。西水濁以湍、水濁風自潔。一水玉女帶、衆山長官笏。百匝山水屏、千堆浪花雪。安得假笠簑、度此風雨疾。冥想娛夢魂、一覺萬山越。伸首出篷窗、端州已造謁。初日窺峽絳、衆星嚴陣列。謂牝牝牝柯恒浩淼、古塔雙傲兀。漱吸萬里流、鬢待曉風櫛。好整方以暇、從容衣帶結。忽報敵機來、來不待排闥。仰瞻白雲間、其勢不可忽。萬命奔如瀉、非謂遂宸慄。坐猶不垂堂、避兇聊趨吉。余作卷葉蟲、篷底窺瞥瞥。鐵羽盤空翔、如饑鷹攫食。乍見一物墮、驟下如折翼。詎知肆窮兇、俯衝投彈術。其聲尖以厲、繼之以霹靂。餘復相尤效、縱橫交飛歟。當此頃刻間、彈下如雨密。殺聲布大地、轟騰興怒叱。劫灰衝層霄、直氣不可屈。縷縷怨火中、萬衆皆欲裂。殷殷鳳皇花、死是肉與血。忍痛古端州、俯首但沉默。黔驢技終窮、肆虐能事畢。長吁出船頭、痛爲災黎恤。惜我龍城將、戍遠未及出。恨無射雕手、應弦殲一一。遂令東徙梟、得意鳴猖獗。怨毒之於人、終見計大拙。將以牙還牙、此義非徒說。爾時衆醜類、無暇收吐舌。戰禍誰啓端、有悔當自齧。天地巧化工、爲鑄大錯鐵。此鐵何所需、爲敵布覆轍。行看會盟師、直搗黃龍穴。苟汝能忍死、興亡供汝閱。舟子聞我言、軒眉會心悅。端州永無恙、揮手珍重別。朝揚洞口帆、暮掛河頭月。

甲申隨軍北發

宿春適百里、行麓雜軍曹。舉足眞成重、側身行所勞。古原落日遠、饑鶻逆風高。野有未春草、經霜垂二毛。

寒食詣四弟廷獻墓

風雨薦寒食、江城春遂深。吞聲五年所、攜淚一本尋。薄有山花供、難爲宿草心。不無危苦



語、淒斷脊令吟。

乙酉元月初三日敵犯南雄余竄身荒谷時值大雪敵兵夜至幾爲所執憤筆書此  
洶洶賊勢猶移國、涕泣叢菁有竄身。敵至拚教親蕪火、崖傾寧計及霜筠。未聞元敬思全薊、  
空聽包胥首碎秦。肉食紛紛何足數、亂山狂雪護遺民。

敵兵竄去宿雨初晴過鄧平標竹安居小飲

濕翰何堪弓再驚、飄危風雨驟云晴。軒眉山色真能舞、連袂竹陰勢欲行。詞客溫溫心輒許、  
酒娘灑灑日初成。前溪日聒廣長舌、正爲人間罪甲兵。

一九四五年八月十五日日本投降八年烽火一旦休兵喜極有賦

唾手侈言決九州、終成孤注此番休。降魔剛費兩原子、弭禍添盟四巨頭。蘇俄最後加  
盟中英美聞捷頓  
乾開府淚、曰歸難已杜陵愁。江山都在狂歡裏、心有白雲即廣州。

戊子江南紀遊

白雲冉冉從吾駕、朝發羊城午石城。岩上獻花花欲笑、櫻洲元自有深盟。  
眼識穿雲越鄱陽、水村暮布瞰青蒼。空航千里一彈指、玄武湖邊晉午觴。  
水西門外莫愁湖、劫後湖淤共海枯。憶得雲鬢歸絕代、只應明月識羅敷。  
我生恨晚嘆來遲、不見奏淮全盛時。兩岸一河楊柳月、銷魂陳蹟最堪詩。

庚寅再避居澳門晚秋南灣散步同印雪谷雛

二客忽從話沈寥、步虛游更及逍遙。十年惘惘尋詩地、如此風波又見招。

甲午春寒

容易一冬了、春來只辦寒。寒雲休幻絮、滄海久汎瀾。山意青終厚、竹心苦未安。不應偏袖  
手、把茗接芳盤。

香港遇余少騷書肆偕飲

天風吹我脫然來、喜汝書城萬堞開。客子光陰渾自擲、蠹魚身世罷相哀。已看海水排欄楯、莫遣蹉跎近酒杯。肯信淵明深味語、不辭糟肉泛金罍。

乙未清明日偕汪孝博登媽閣後山

年年負此清明節、聊借他山共眺思。古廟紅棉撐氣象、疲心頑石起嶽崎。荒荒日色排雲亂、隱隱春帆出海遲。君是鏡湖煙水客、可堪蓴鱸在違時。

桐心竹詩并序

澳門孔教中學校苑植梧桐修竹桐老已空其心竹則乘虛貫桐心而出相得並茂寓君子投契之象嘗記家二樵先生有桐心竹詩一時唱和甚盛不期百餘年間又逢斯異而二君子都孕育於聖門中尤覺雨化及微因效爲桐心竹詩以記造物之巧合云耳

草木猶沾聖教深、竹桐相契腹推心。要聞人籟親哀玉、那遣孤懷欲化琴。并命股肱忘族類、辭根蓬梗笑商參。眼前不異乾嘉世、何事承平未可尋。

丙申秋階諸生游松山麓酒後有述

舉目猶疑天地寬、過江今亦覺爲難。聊因佳日偃松麓、便與諸生賽野餐。人向秋邊聯雁字、杯涵海氣接鯨瀾。曲肱更藉斜陽外、顛倒湖山入醉看。

戊戌七月七日鄉彥楊萬如招遊石澳晚飲桃花澗館同羅叔重張振圖雷宏張

驅車香島道、縮地共斯遊。野水桃花澗、碧雲石澳秋。極天餘一線、孤嶼迴無儔。意起滄溟外、風波已白頭。

乙巳九日

霖雨違時久積陰、乍舒晴色待登臨。人間未了諸天劫、秋士難爲九日心。隔水搖青山共老、

高杯沉思酒相深。年年惆悵陳師道、愧對黃花放短吟。

庚戌上巳詩畫琴棋雅集招爲修禊於港島英京酒家

爭及澄和九九春、積陰爲虐已兼旬。搖村江柳今垂首、舉世風魔但側身。見說秉蘭邪可祓、何妨放浪氣相新。英京詩畫琴棋會、不讓山陰好事人。

九月初二日爲余七十初度兒輩於初四日稱觴於九龍新雅酒家九樓賦酌惠臨嘉賓

樂年恒自不知老、七十忽來半信疑。碌碌頑軀吾忝壽、紛紛陳跡月猶眉。多君美意齊雲閣、舊雨新風拂玉卮。便借黃花傳好語、重陽酒近蟹肥時。

辛亥花朝三疊潭圓玄學院雅集即席

雲日清和二月中、與花爲壽普陀東。細聆妙諦潭三疊、初探圓玄路幾重。書憤已多渾自懣、放言何補惜徒工。松葩戟指紅棉血、點染他山氣象雄。

壬子上巳南天竺修禊與會者有茂蕊上人許菊初陳荆鴻陳伯祺梁其政梁耀明等三十九人  
今朝有約南天竺、去歲猶思東普陀。兩地莊嚴宜禊祓、一般游騁共山阿。試摹梵唄延琴客、卻爲伊蒲叱酒魔。可笑右軍元未達、臨文嗟悼意云何。

癸丑上巳修禊是日適逢清明有海上笙歌遊樂

一千六百餘年事、癸丑欣逢佳節迎。海角秉蘭爲上巳、江村搖柳又清明。中西人共傾杯樂、絲竹聲傳醉太平。喚起東山謝安石、微風同翼錦航輕。

甲寅錦山文社第三屆春禊按錦山文社春禊以壬子南天竺爲第一屆第二屆至十七屆在大埔隱廬十八十九兩屆在粉嶺雲泉仙館廿屆在北潭涌渡假村而止

天胡不朗夜煙迷、禊事相期少長攜。旣命巾車香海畔、若論文藻錦山齊。狂且滿目邪難祓、菩薩雙眉久已低。尚有隱廬堪一醉、庭花含笑展瓠犀。